



15 STI' JULIO 2011

TORRE STI' NI RAPA

NI CANÍ' DE REINU STI' JIOBÁ

REVISTA NI CHIGUIUUNDA'

CA TEMA NI CHIGUIUUNDA':

29 sti' agosto—4 sti' septiembre

Ñee ruzú'banu stiidxa' Jiohá
ora rabi laanu xi naquiiñe' gúninu la?

YAZA 10 DIIDXA' RIUUNDA': 26, 3

5-11 sti' septiembre

Ñee zucaadiáganu Jiohá
ora quixhená laanu la?

YAZA 15 DIIDXA' RIUUNDA': 65, 52

12-18 sti' septiembre

Xii nga guendariziila'dxi' sti' Dios

YAZA 24 DIIDXA' RIUUNDA': 19, 27

19-25 sti' septiembre

Ñee ma' biuulu'
lu guendariziila'dxi' sti' Dios la?

YAZA 28 DIIDXA' RIUUNDA': 134, 24



REVISTA *TORRE STI' NI RAPA* rí' rireeni para gusisácani Jobá, Dios ni jma nandxó' guibá' ne lu guidubi naca Guidxilayú. Dxiqué' guyuu caadxi torre, dede ra gunda bí'yacabe xi cayaca sti lugar nuu zitu. Ngaca nga ni runi revista rí', purtí' racaneni laanu gánnanu ximodo cayaca ni na ca diidxa' riguixhená' zeeda lu Biblia ca tiempu stinu. Revista *Torre sti' ni rapa* rí' riguixhedxini ladxidó' binni purtí' rusiidini ma' cayuni mandar Reinu sti' Dios dede guibá' ne zunitiluni guirá' ca cosa malu nuu yanna rí' ne zúnini Guidxilayú rí' ti paraísu. Jesús guti para ganda gapa binni guendanabani ni qué zaluxe ne laabe nga Rey ni cayuni mandar lu Reinu sti' Dios. Revista rí' racaneni binni gapa fe Jesucristu. Ca testigu sti' Jobá rúnica' revista rí' dede iza 1879, ne qué huasaana de gácani dede iza ca. Cadi ti revista ni cuzeet' de política ni, sínuque lu Biblia nga riree guirá' ni rusiidini.

Revista *Torre sti' ni rapa* rí' rireeni lu guidubi naca Guidxilayú para gusiidini binni de Biblia, ne para gaca dxiña' ca riquiñe' bueltu ni rudii binni bia' ná' ladxidó'. Cadi naquiñe' guidoo ni. Pa cadi cá gadxé' la? ca textu rí' bireecani lu *Stiida Dios Dídxazá* o lu *Traducción del Nuevo Mundo de las Santas Escrituras (con referencias)* [NM].

NI CHIGUSIIDÍ' CA TEMA RÍ' LAANU



PRIMÉ NE GUIROPA TEMA ZEEDACANI LU YAZA 10-19 ▲

Nadxii Jobá laanu, nga runi rábibe laanu xii nga ca cosa malu ni zanda cueechú laanu de neza ra ziuunu para guicaanu guendanabani ni qué zaluxe. Lu guiropá' tema rí' zadú'yanu xi zanda gúninu para cadi guiábanu lu xhoopá' de ca trampa ni riquiñe' Binidxaba'.

GUIONNA NE GUIDAPA TEMA ZEEDACANI LU YAZA 24-32

Biblia na: «Lu gadxe gubidxa de cuzá' Dios [...] bi-ziila'dxi», ne bizulú' caziiá'dxibe despué de biza'be binni guidxilayú (Heb. 4:4). Lu primé tema rí' zazí' dinu xi para gulee Dios ti dxi para guiziila'dxi' ne xiñee nabé risácani para laanu. Guiropa tema ca zacané laanu guidú'yanu pa nuunu lu guendarizii-lá'dxi' sti' Dios.


XCAADXI TEMA

3 Biree sti revista *Torre sti' ni rapa* lu diidxa' inglés ni ziene binni jma nagueenda

4 Bí'ni' ganar ca xpinni Jobá ti juicio ▶



20 Qué ridxibe' gate', ma' cabeza' guicaa' guendanabani ▶





Biree sti revista *Torre sti' ni rapa* lu diidxa' inglés ni ziene binni jma nagueenda

RIÉCHEDU stale gábidu laatu zuzulú zaree sti revista *Torre sti' ni rapa* lu diidxa'

inglés ni ziene binni jma nagueenda. Zareeni guidubi ti iza, ne pa guihuinni nabé cayacane-ni binni la? zácaru' ni. Zindani ra nuu ca neza binni ridagulisaa tiempu ca rindá sti revista ni maca runibia'nu. Lu revista cubi rí, zeeda ca tema ni riuunda' cada semana, ne ora ganda la? zaguucabe xcaadxi tema luni. Xi para chiguiree revista rí' ya'. Para gacaneni stale testigu sti' Jio-bá guiene chaahuica' guirá' ni caquiiñe' gánna-ca' ora ma' cayuundaca' ni.

Ndaani' ca guidxi casi Fiyi, Ghana, Kenia, Liberia, Nigeria, Papúa Nueva Guinea ne ca isla Salomón jma riní' binni inglés. Nga nga diidxa' ni riqiiñe' ca bí'chinu ne ca bizá'nanu lu ca guendaridagulisaa rápaca' ne ora rucheechecha' diidxa', neca gadxé diidxa' riní'ca' raldxica'. Peru inglés ni riqiiñenu lu ca libru ne revista stinu, jma nagana ni que ni riní'cabe. Ne stale de ca xpinni Jio-bá nabézaca' zitu de guidxi ra gúleca' ne para ganda guini'neca' binni naquiiñe' guini'ca' inglés, neca huaxié' nánna'ca' diidxa' ca. Ne nuu de laacabe qué randa rieca' ndaani' ti neza binni ridagulisaa ra riní'cabe stiidxaca'.

Casi ma' nánnanu, lu ca tema ni ridú'ndanu lu revista *Torre sti' ni rapa* nga rizi'dinu guirá' ni naquiiñe' gánnanu órape' caquiiñenu ni. Nga runi, para ganda guiene chaahuí' ca bí'chinu ne ca bizá'nanu ni riní' diidxa' inglés guirá' libru

ne revista ni ribee xquidxi Dios la? zaree sti revista tiempu ca riree revista ni maca ridú'ndanu guirá' semana, peru zaquiiñeni diidxa' ni cadi nagana para guiene binni. Gadxé modo chiguiree primé yaza stini, peru ca subtítulo stini, ca párrafo, ca guendarinabadiidxa' stini ne ca dibuju gueeda luni, zeeda cani cásica sti revista ca. Nga runi, cada xpinni Cristu zanda gu'ya' guná' revista *Torre sti' ni rapa* jma ziuula'dxi' gu'nda'. Pa riní'lu' inglés, ñuulá'dxilu' ñánnalu' ximodo jma nagueenda riene binni ni cá lu revista cubi ca la? Ñee yaza rí' zuuyalu' ti ejemplu ra cá caadxi diidxa' ni biree lu guiropa párrafo sti' primé tema ni chiguiiunda' lu revista rí'.

Stale xpinni Cristu ma' huanábaca' Jio-bá: «Bisiene naa, ti ganda guiziide' ca mandamien-tu stilu'» (Sal. 119:73). Nanna dxíchidu zacané revista cubi rí' ca xpinni Cristu para gúnica' ni rinábaca' Jio-bá. Ribézadu gacaneni cani nahuiini' ne ca binni ni huaxié' riní' inglés para guiene chaahuica' ni guiuunda' lu revista *Torre sti' ni rapa* guirá' semana. ¡Xquixepe' lii Jio-bá, pur cusihuínnilu' «[nadxiilu'] irá ca hermanu» ne pur caquiiñelu' «mozo ni nuu xpiaaní' ne ni runi jneza» para gudii laadu guirá' ni caquiiñe-du! (1 Ped. 2:17; Mat. 24:45.)

*Gruppu ni Zaniru'
sti' ca Testigu sti' Jio-bá*

Standard English:

In this article, we will discuss three negative influences. The first is an external force, the second an internal one. The third is not even real; nonetheless, it is very dangerous. We need to know what these influences are and how our heavenly Father teaches us to resist them.

Simplified English:

In this article, we will talk about three dangers. The first danger comes from other people. The second comes from inside of us. The third comes from something that is not real. We need to learn what these dangers are and how Jehovah helps us to avoid them.



BI'NI' GANAR CA XPINNI JIOBÁ TI JUICIU

BIZULÚ guendanagana ri' lu iza 1995 ne ma' bindaani quince iza. Guirá' ca iza ri' ma' bi'ni' huantar ca testigu sti' Jiohá de guidxi Rusia stale modo rucaalú binni ni qué riná chu' sti religión ndaani' guidxi ca laacabe. Nécape' né stale gana rucaalú binni ca Testigu de guidxi Rusia ne de xcaadxi lugar para gucuezaca' dxiiña' rúnicabe, ca bí'chinu ne ca bizá'nanu ni nadxiinu, qué rusaanaca' de gúnica' ni na Dios, ne ma' gucané Jiohá laacabe para guni ganárcabe ti juiciu. Yanna, ximodo bizulú guendanagana ri' ya'.

MODO NUUCABE ANTE GUZULÚ GUENDANAGANA QUE

Lu iza 1917 biniti ca testigu sti' Jiohá derechu para guni adorarcá' laabe, peru ra biu'nu dxi bizulú ca iza sti' 1990, ca bí'chinu ne ca bizá'nanu gucuaca' derechu que sti biaje. Lu iza 1991 guca registrárcabe casi ti religión, ne biaba si Unión Soviética, laaca bi'ni' registrar gobiernu cubi sti' Rusia laacabe. Gobiernu cubi ri' guní' dxandí' guzananda gobiernu ni biaba que ca Testigu pur religión stica'. Lu iza 1993, Departamento de Justicia ni nuu Moscú bi'ni' registrar laacabe casi ti religión ne gulee lá laacabe «Comunidad de los Testigos de Jehová de Moscú». Ne laaca lu iza que, gudi-xhe gobiernu que sti ley cubi ra na zanda gapa binni religión ni chuula'dxi'. Ti xpinni Cristu guní' de ca dxi que: «Nin lu bacaanda' qué niní' íquedu pa ñápadu ca derechu que». Ne laaca guní'be: «Gupa xidé gudi'dí' cincuenta iza para gucuaadu ca derechu que».

Dxandí' gúcani ti tiempu galán para ca xpinni Cristu ni nuu Rusia (2 Tim. 4:2). Ne bi-quiiñecabe tiempu que jneza. Bicheechecabe diidxa' né stale gana ne gucanéca stale bi-

nni para guziidi' de Dios. Sicarí' guní' ti misionera: «Nabé guyuula'dxi' ca binni que gánaca' de religión». Bidale cani rucheeche diidxa', ca precursor ne guyu jma neza binni ridagulisaa. Chonna gayuaa si Testigu nuu Rusia lu iza 1990, peru lu iza 1995 ma' nácacabe gaayu' mil. Cumu nabé nagueenda bidale ca Testigu lu chupa chonna iza si la? bicaani ca xhenemígucabe gucaaluca' laacabe lu iza que ne yeneca' laacabe nezalú stale juez. Zaqué nga bizulú bicaalúcabe ca xpinni Cristu ne bí'nicabe ni de tapa modo.

QUÉ NIBEENDÚCABE GASTI' NÉ GUIRÁ' NI BÍ'NICABE

Primé biaje bicaalúcabe ca Testigu gúcani lu beu junio sti' iza 1995. Ti grupu de binni de Moscú ni naca tobi si ne Iglesia Ortodoxa ni nuu Rusia guní'ca' runi ca Testigu caadxi cosa ni na ley cadí naquiiñe' gaca, ne guní'cabe cadxiichi stale binni purti' ma' guca binnilídxica' Testigu. Lu beu junio iza 1996 biiya' caadxi xpinni gobiernu cadí dxandí' guirá' ni caní'cabe de ca Testigu. Neca zaqué, grupu de binni de Moscú que bibigueta' guní' cadí jneza ni cayuni ca Testigu ne bí'nicabe ni stapa biaje. Peru lu cada biaje bihuinni cadí dxandí' guirá' ni caní'cabe de ca Testigu. Últimu la? sti gunaa ni biuu para gu'ya' ni caya-ca raqué binduuxe' juiciu que 13 sti' abril iza 1998.

Ti abogadu ni guyu lu juiciu que guní': «Málasí bizaaca xiixa ni cadí cabeza binni gaca». Nécape' guní' gunaa ni runi dxiiña' lu Ministerio Público que cadí dxandí' cucheené ca Testigu ley sti' guidxi que la? guní'be zanda quixe ca Testigu ti multa pur ni caní' ca binni que de laaca'. Ministerio Público ni nuu ladu

guia' de Rusia guni' zaa quíxecabe ni.* Lu 29 sti septiembre iza 1998 guyécabe nezalú Tribunal Municipal del Distrito Golovinsky ni nuu Moscú. Raqué nga bizulú guiropa modo bicaalúcabe ca Testigu.

BIIYACABE XI RINÍ BIBLIA RA CAYACA JUICIU QUE

Lu juicio rí' guyuu Tatyana Kondratyeva. Laabe biquiínebe ti ley ni guca firmar lu iza 1997 para gucaalube ca Testigu. Ley que na ca religión si ni zanda chu' nga Iglesia Ortodoxa, islam, judaísmo ne budismo.# Pur ni na ley ca ma' qué zanda chu' sti religión ndaaní' guidxi ca. Ne laaca pur ni na ley ca zanda gucueeza ca juez xiixa religión ni rucaa ca xpinni gaca nanala'dxi' stobi. Nga nga ley ni biquiíne' gunaa ni runi dxiiña' lu Ministerio Público que para guini' rucaa ca Testigu binni gaca naladxisaa ne ruchiaca' familia, ngue runi cadí naquiiñe' d'í' gacacabe ti religión.

Ti abogada ni nuu pur ca Testigu gunabadiidxa': «Ñee zanda guini'tu lá ca Testigu ni nuu lade ca binni ridagulisaa de Moscú ni cucheené ley la?». Qué ñanda nini' gunaa ni runi dxiiña' lu Ministerio Público que lá nin tobi. Peru guni'be raca nanala'dxi' ca Testigu binni de sti religión pur ni ruundaca' lu ca libru ne ca revista stica'. Ne gualá'dxibe nusihuínnibe dxandí' ni caní'be ora biindabe caadxi diidxa' ni zeeda lu *Torre sti' ni rapa*, lu ¡*Despertad!* ne lu xcaadxi libru nápanu (biiya' foto zeeda luguia' ca). Ora gunabadiidxacabe laabe xiñee caní'be raca nanala'dxi' ca Testigu binni de sti religión la? bicábibe: «Ca Testigu rusiidica' laasica' nga religión ni dxandí'».

Ti abogadu ni naca xpinni Cristu bidii ti Biblia gunaa ni nuu de juez raqué ne bidiibe sto-

* Guní'cabe quixe ca Testigu multa que 20 sti' abril iza 1998. Gudi'dí' si chupa semana, 5 sti' mayo, b'ni' firmar Rusia Convenio Europeo de Derechos Humanos.

Ti periódicu na: «Iglesia Ortodoxa ni nuu Rusia nga bicaa gobiernu quixhe ley ca, purti' qué racala'dxi' chu' sti religión ndaaní' guidxi ca ne rapa gana gucueeza gobiernu ca testigu sti' Jioabá» (Agencia Associated Press, 25 de junio de 1999.)



bi gunaa ni runi dxiiña' lu Ministerio Público que, ne biindabe ni cá lu Efesios 4:5 ra na: «Tobi si Señor nuu, ne tobi si ni runi cre nu, ne tobi si xi pur riuu nisa irá binni». Qué nindaa de ngue, guiónnacabe bizulú biindacabe xcaadxi textu ni zeeda lu Biblia casi Juan 17:18 ne Santiago 1:27. Gunaa ni nuu de juez que gunabadiidxa': «Ñee rucaa ca versículo rí' binni gaca nanala'dxi' tuuxa ni naca de sti religión la?». Gunaa ni runi dxiiña' lu Ministerio Público que na qué zanda d'í' guicabi purti' huaxié' nanna de Stiidxa' Dios. De raqué guni' abogadu que ni na caadxi libru sti' Iglesia Ortodoxa ra cá pabiá' caní'cabe mal de ca testigu sti' Jioabá ne gunabadiidxabe: «Ñee cadí cucaalúcabe ley né ni caní'cabe lu ca libru rí' la?». Gunaa que na: «Qué zanda d'í' guicabe', purti' qué gánnadia' stale de religión».

QUÉ NIDXÉLACABE MODO NUGAANICABE DONDA CA TESTIGU

Ora guni' gunaa ni runi dxiiña' lu Ministerio Público ruchiá ca Testigu stale familia la? bizeetebe qué rúnica' caadxi saa, casi Navidad. Peru laca laabe guni'be qué gapa Rusia ti ley ra na naquiiñe' guni binni Navidad, nga rusihuinni napa binni derecho para cuí xi guni. Laaca guni'be qué rudii ca Testigu lugar guziila'dxi' ca xiiñica' o gúnica' xiixa para chu'ca' nayeche'. Peru laaca bizeetebe qué huaní'nebe nin tobi de ca xiiñi' ca Testigu. Ne



Xiñee dede Francia yendá ti juicio bí'ni' Rusia

Rusia bí'ni' firmar Convenio Europeo de Derechos Humanos 28 stí' febrero iza 1996, ne 5 stí' mayo iza 1998 gun'cabe jneza nuu ni. Ora bí'ni' firmárcabe ni la? bisihuínnicabe guirá' binni xquídxicabe zanda iquiiñe' ca derecho rí':

«Zanda gapa binni religión ni chuula'dxi'; nga riní' zanda gucha tuuxa de religión, ne laaca riní' ni zanda gusihuinni binni xi religión napa ne xi runi cré nezalú stale binni o ra lidxi.» (Artículo 9.)

«Zanda guini' binni xi riní' ique ne laaca zanda guiziidí' xiixa ne gusiidí' sti binni.» (Artículo 10.)

«Zanda guidagulisaa binni sin chu' tu guchiichi laaca'.» (Artículo 11.)

Ca binni o ca religión ni gu'ya'cadi cayuni respetárcabe ca derecho stica' pur caní na Convenio bí'ni' firmardu rí' ne qué ganda gaca chaahui' ca guendanagana stí' ndaaní' xquidxi la? zanda che' ra nuu Tribunal Europeo de Derechos Humanos, ni nuu ndaaní' guidxi Estrasburgo ni nuu Francia (biyya' foto ca). Lu Tribunal ca nuu 47 juez —biacá nga guidxi ni bí'ni' firmar Convenio Europeo de Derechos Humanos—, ne ca guidxi ni bí'ni' firmar Convenio ca naquiiñe' gúnica' ni na ca juez ca.

ora gunabadiidxacabe laabe pa ma' huayebe tobi de ca guendaridagulisaa stí' ca Testigu, bicábibe: «Qué huayuu xiixa ni gucaa naa chaa ni».

Yanna xi bí'ni' gunaa ni runi dxiiña' lu Ministerio Público que ya'. Bí'ni' invitarbe ti profesor de Psiquiatría ni nabé nanna de dxiiña' stí' para che' ra cayaca juicio que. Profesor que guní' riguite ca libru ne ca revista stinu ique binni ne runi huarani xpiaanica'. Abogadu stí' ca Testigu que gudxi laabe zeeda ni guní'be que lu ti guí'chi' ni bí'ni' ca xaíque stí' Iglesia Ortodoxa ni nuu Moscú, óraque guní' profesor que dxandí' zeeda caadxi de ca diidxa' ni guní' cásipe' modo cá ni lu guí'chi' que. Profesor que guní': «Riquiiñedu ni zeeda lu ti disquet ni maca nápadu para guzulú guinidu de ca Testigu». Laaca guní'be qué huayuu dxi guini'nebe ti testigu stí' Jlobá. Peru sti profesor de Psiquiatría ni guyé ra cayaca juicio que bizeete' ma' guní'né jma de ti gayuaa Testigu ni nuu Moscú ne biyya' cadi huará dí' xpiaanicabe ne jma runi respetárcabe binni de sti religión.

BÍ'NI' GANAR CA TESTIGU JUICIU QUE, PERU TI TIEMPU SI

Doce stí' marzo iza 1999, guli juez que gaa-yu' binni ni nanna para gú'ndaca' ca libru ne ca revista stinu ne raqué bisaanabe juicio que. Peru laga cayaca ngue, Ministerio de Justicia stí' guidxi Rusia guli sti grupu de binni para gú'ndaca' ca libru ne ca revista stinu. Lu 15 stí' abril iza 1999, grupu rí' guní' qué nidxela nin ti cosa malu lu ca libru ne ca revista que. Ngue runi, lu 29 stí' abril iza 1999, Ministerio de Justicia stí' guidxi Rusia bí'ni' registrar ca testigu stí' Jlobá casi ti religión sti biaje. Neca ma' biyya' ca juez de Moscú qué rusiidí' ca guí'chi' stí' ca Testigu xiixa cosa malu la? gunábacabe chu' sti grupu de binni ni nuu xpiaani' para gu'nda' ca libru ne ca revista que sti biaje. Zacá bizulú ti cosa ni nabé bidxagayaa binni: laga caní' Ministerio de Justicia stí' guidubi guidxi Rusia qué gapa ca Testigu donda ne runi respetarca' ley la? sti grupu huiini' de binni —Departa-

mento de Justicia ni nuu Moscú— cuyúbica' ximodo ugaanica' donda ique ca Testigu.

Gudí'dí' bia' chupa iza para guyécabe nezalú ca juez que sti biaje. Lu 23 stí' febrero iza 2001, juez Yelena Prokhorycheva guní' gastí' razón para gucueezacabe ca Testigu de gúnica' dxiiñá' stica' ndaani' guidxi Moscú. Dxiqueru' nga bihuinni nezalú ca juez que gapa ca bí'chinu ne ca bizá'nanu donda de guirá' ni cugaanica-be íqueca'. Peru gunaa ni runi dxiiñá' lu Ministerio Público que guní' cadí' jneza ni guní' juez Yelena Prokhorycheva, ne gunábabe Tribunal ni nuu ndaani' Guidxi Moscú gu'ya' guendana-gana que sti biaje. Chonna beeu despué, 30 stí' mayo iza 2001, guní' Tribunal que cadí' jneza ni guní' juez Yelena que. Ne gunaba' Tribunal que gaca sti juicio ne chu' gunaa ni runi dxiiñá' lu Ministerio Público que luni, peru gácani nezalú gadxé juez. Zacá nga bizulú guionna modo bicaalúcabe ca Testigu.

BINITI CA TESTIGU JUICIU QUE, PERU LAACA TI TIEMPU SI

Bizulú juez Vera Dubinskaya juicio que sti biaje 30 stí' octubre 2001.* Tatyana Kondratyeva, gunaa ni runi dxiiñá' lu Ministerio Público que, bibigueta' guní' rucaa ca Testigu binni gaca nanala'dxi' stobi. Ne guní'be, pa gucueeza gobiernu ca Testigu de gúnica' xhiiñá' Dios la? zaquiiñeni para gápani ca Testigu ni nuu Moscú. Ndaani' guidxi que nuu chii mil Testigu, ne ora gúnnacabe ni guní' gunaa que la? guirá'cabe bí'ni' firmárcabe ti guí'chi' ra cayábicabe Tribunal que cadí' caquiiñecabe chu' tu gapa laacabe.

Gunaa ni runi dxiiñá' lu Ministerio Público que guní' cadí' caquiiñepe' gusihuinni ca Testigu cadí' dxandí' ma' bí'nica' cosa malu, purtí' para laabe cayaca juicio que pur ca libru ne ca revista stica' ne pur ni runi creca', ne cadí' pur dxiiñá' ni rúnica'. Laabe guní'be zuseendacabe tobi de caní' riní' pur Iglesia Ortodoxa Rusa

* Dxipe' cayaca guirá' ndí' cusaa chii iza de gudixhe gobiernu stí' guidxi Rusia ti ley ra na dxandí' guzananda gobiernu stí' Unión Soviética ca Testigu pur religión stica'.

para gueeda ra cayaca juicio que. Ni guní'be que bisihuinni tupe' nga racalá'dxi' gucueeza ca Testigu, laacabe nga Iglesia Ortodoxa. Lu 22 stí' mayo iza 2003, Vera Dubinskaya guní' chu' sti grupu de binni para gu'nda' ca libru ne ca revista stí' ca Testigu sti biaje.

Bizulú juicio que sti biaje lu 17 stí' febrero iza 2004 para gú'yacabe xi bidxela ca binni que lu ca libru ne ca revista que. Ca binni rí' biiyaca' rusiidi' ca libru ne ca revista stí' ca Testigu ximodo guibaniné binni familia stí' galán ne ximodo chu' nayeche' lu xquendaxheela'. Qué nidxélacabe xiixa ni nusihuinni rucaa ca Testigu binni gaca nanala'dxi' stobi. Xcaadxi binni ni nanna de laani guní'ca' dxandí' ni bizeete' ca binni que. Ora gunabadiidxacabe ti profesor ni nanna historia stí' ca religión ca xiñee rucheeche ca testigu stí' Jiobá diidxa', laa bicabi ca juez que sicarí': «Napa xidé gucheeche ca xpinni Cristu diidxa'. Nga nga ni cá lu Biblia ne bí'ni' mandar Cristu ca discípulo stí' chigucheeche'ca' diidxa' guirá' ladu». Neca guní' ca binni ca zacá, bicueeza juez que dxiiñá' runi ca testigu stí' Jiobá ndaani' capital stí' guidxi que 26 stí' marzo iza 2004. Lu 16 stí' junio iza 2004, guní' Tribunal ni nuu ndaani' Guidxi Moscú bia'si ni guní' juez que.* Ora caní' ti Testigu ni ma' xadxi de cayuni xhiiñá' Jiobá de ni guní' juez que naquiiñe' gaca, guní'be ca diidxa' rí': «Dxi bí'ni' mandar Unión Soviética, ti binni de guidxi Rusia naquiiñe' gusihuinni qué runi cré Dios; peru ca dxi rí' ma' naquiiñe' gaca binni ortodoxo».

Xi bí'ni' ca xpinni Cristu ora gúnnaca' ma' bicueeza gobiernu laaca' ya'. Bí'nicabe cási-ca bí'ni' Nehemías. Nin laabe nin xquí'dxi-be qué nidxí'bicabe ca xhenemígucabe ne qué nusaana de nucuícabe ca lindaa stí' Jerusalén. Laacabe qué nusaana de «nucuícabe ca lindaa que [ne] guyuu ladxidó' guidxi que para

* Né ni guní' Tribunal ca bixiá' registru ni napa ca Testigu nezalú gobiernu, yanna ma' qué gapa ca xpinni Cristu ni nuu Moscú tu guini' pur laaca'. Ne ni guca rí', ca xhenemigu ca Testigu jmaru' si nagueenda zucueezaca' laacabe de gúnicabe dxiiñá' sticabe.

Ni guní'ca juez

Chiguzé'tenu caadxi de cani guní'ca juez ni nuu lu Tribunal Europeo de Derechos Humanos.

Ora guní'ca binni que ruchiá ca testigu sti' Jjobá ca familia la? ca juez que guní'ca' sicarí':

«**Bizulú guendanagana ri' pur ca binni ni rucaalú ca Testigu ne qué runi cré ni ru-siidicabe, purti' ca binni ri' qué runi res-petarca' derechu ni napa binnilídxica' ni naca Testigu.**» (Párrafo 111.)

Ca juez ni nuu Europa que laaca qué ni-dxéla'ca' razón para guni creca' dxandí' napa ca Testigu modo guchaaca' xquenda-biaani' binni:

«**Bidú'yadu qué liica nuzete' Tribunal ni nuu Rusia nin ti lá tuuxa binni ni ná'cabe bichaa xquendabiaani' pur gudxite ca Testigu ique.**» (Párrafo 129.)

Laaca guní'cabe cadí jneza dí' ni guní'ca binni que ora naca' rudii ca Testigu lugar gati ca xpínnica' ora qué rinaca' guicácabe rini:

«**Zanda cuí binni xi tratamientu guicaa ne xi qué zaca, o guiní' xi sti tratamientu zanda guicaa ora ma' cayuni tender tuuxa doctor laa. Guirá' binni ni ma' huaníisi ne huará napa derechu de cuí xi guni, casi pa zudii lugar guni operárcabe laa o guicaa xiixa tratamientu, ne zacaca zanda guni ora gá'cabe laa pa zacá rini.**» (Párrafo 136.)

guni dxiiña'» (Neh. 4:1-6). Zacaca nga bí'ni' ca xpinni Cristu ni nuu Moscú, laaca qué nu-diicabe lugar nibee ca xhenemígucabe gana laacabe de gucheechecabe ca diidxa' nacubi ne galán sti' Reinu (1 Ped. 4:12, 16). Cumu ná-nnacabe zapa Jjobá laacabe la? ngue runi ma' nuucabe listu para ora guzulú guidapa modo gucaalú ca binni que laacabe.

JMA BININÁ'CABE CA TESTIGU

Lu 25 sti' agosto iza 2004, biseenda' ca Testigu ti guí'chí' ra nuu Vladimir Putin, hombre ni naca presidente sti' Rusia iza que, ra cayábica-be laabe ximodo cayuni sentírcabe purti' ma' bicueeza Tribunal sti' Moscú dxiiña' ni cayúnicabe. Guí'chí' ni yendá ra nuu presidente que ne 315,000 firma sti' ca Testigu bia'si bizaani 76 volumen. Laga cayaca ngue, bisihuinni Iglesia Ortodoxa Rusa xi racalá'dxi'. Tobi de ca binni ni riní' pur ca xaíque stícabe ni nuu Moscú guní': «Laadu qué liica racalá'dxidú dxiiña' ni runi ca testigu sti' Jjobá». Ne tobi de ca xaíque sti' ca musulmán guní': «Ndí' nga ni jma galán bizaaca ndaaní' guidxi ri'».

Bí'ni' cré caadxi binni ca cosa ni cadí jneza caní'cabe de ca Testigu, ngue runi bizulú bicaaluca' laacabe. Nu tu bidiicabe puñete laa ne guluu ñeecake laa ora cucheeche diidxa' ndaaní' capital que. Ti biaje, ora cucheeche ti gunaa xpinni Cristu diidxa' ndaaní' ti edificiu, biree ti hombre ni nabé cadxiichi bidii ti pata-da galaa déchebe dede biábabe ne gudxibi íquebe lu pisu que. Neca biiya' doctor laabe purti' gucanabe, qué nucueeza puliciá hombre bininá laabe. Gunaaze' puliciá xcaadxi de ca Testigu, gucuaacabe ca huella stica', guleecabe foto laaca' ne biseguyooacabe laaca' guidubi ti gueela'. Caadxi de ca binni ni ruquixe laacabe ca lugar ra ridagulisaacabe ma' qué ninaca' ñúnica' ni, purti' bidxí'bica' nunítica' xhiiñaca'. De ti dxi para sti dxi, stale xpinni Cristu ma' qué ñápaca' ti lugar ra nidagulisaa'ca'. Cuarenta neza binni ridagulisaa biquiíñeca' tapa si Yoo sti' Reinu, ne tobi de laacabe gupa xidé bí'ni' Guendaridagulisaa para Guirá' Binni las siete y

media siadó'. Sicarí' guní' ti binnigola ni riganna ca neza binni ridagulisaa: «Para ganda che' ca xpinni Cristu ti guendaridagulisaa napa xidé guíásaca' las cinco siadó', ne bí'nica-be ni né stale gana jma de ti iza».

BIQUIIÑENI PARA GANNA BINNI DE JIOBÁ

Ca Testigu rápaca' gana gusihuínnica' cadí jneza ngue bicueezacabe dxiiña' rúnica' ndaaní' guidxi Moscú. Ngue runi, lu diciembre 2004 guyé ca abogadu stinu nezalú Tribunal Europeo de Derechos Humanos (biiya' cuadro ni zeeda lu yaza 6 «Xiñee dede Francia yendá ti juicio bí'ní' Rusia»). Xhoopa' iza después, 10 stí' junio iza 2010, guní' Tribunal rí' qué gapa ca Testigu donda de guirá' ni cugaanicabe íqueca'.* Biiyacabe cadí dxandí' guirá' ni caní' binni de ca Testigu. Ne guní' Tribunal que cadí naquiiñe' gucueeza Rusia ca Testigu ne guyúbica' modo guni chaahuica' ca guendanagana ni gúpaca' né laacabe (biiya' cuadro ni zeeda lu yaza 8 «Ni guní' ca juez»).

Tribunal Europeo de Derechos Humanos guní' rapa Convenio Europeo de Derechos Humanos dxiiña' runi ca testigu stí' Jioβά. Ne cadí ndaaní' guidxi Rusia si naquiiñe' gaca ni guní'cabe, sínuque laaca naquiiñe' gácani ndaaní' sti 46 guidxi ni nuu lu Consejo de Europa. Stale juez, binni ni riguijhe ley, ne xcaadxi binni ni nuu lu guidubi naca Guidxilayú ni ruunda' de ca derechu ni napa binni, laaca cayuulá'dxica' ni guní' Tribunal ca. Xiñee ya'. Purti' para guní' Tribunal ca xi naquiiñe' gaca la? biquiiñecabe xhono ejemplu ra guní' caadxi juez qué gapa ca Testigu donda de caní' cugaanicabe laaca'. Laaca guní'cabe de ga' biaje bí'ní' ganar ca Testigu ora yenécaabe laaca' nezalú Tribunal stí' xcaadxi guidxi casi Argentina, Canadá, España, Estados Unidos, Japón,

* Lu 22 stí' noviembre iza 2010, ti grupu de gaayu' juez ni nuu lu Gran Sala del Tribunal Europeo de Derechos Humanos qué ninaca' ñaca sti juicio ra nuuca'. Nga rusiuhinni naquiiñe' guni Rusia ni guní'cabe 10 stí' junio iza 2010 que.

Reino Unido, Rusia ne Sudáfrica. Guirá' ca ndí', ne modo bidxiilú ca Testigu caní' bí'ní' Ministerio Público ni nuu Moscú laaca', zanda iquiiñe' guirá' ca xpinni Cristu ni nuu lu guidubi naca Guidxilayú ni para gusihuínnica' zanda guni adorarca' Jioβά modo racalá'dxi'.

Sicarí' gudxi Jesús ca xpinni: «Zuchiña cabe laatu ra nuu ca gobernador ne ra nuu rey purti xpinne laatu, ne zacá laca zanda güi tu stiidxa nezalú caní' cadí za de Israel» (Mat. 10:18). Guendanagana ni gúpacabe nezalú ca juez stí' Rusia lu quince iza ni ma' gudí'dí' ca, huaquiiñe' ca Testigu ni para ganda gusiidica' binni de Jioβά, cásica ndaaní' capital stí' Rusia ne sti ladu. Guirá' ni guninu lu tema rí', huayacaneni binni ganna jma de ca testigu stí' Jioβά. Ne casi guní' Jesús, «cayacané ni para ireeche» ca diidxa' nacubi ne galán ca jma ne para ganna binni de laabe (Fili. 1:12). Yanna, ora ma' zigucheeche ca testigu stí' Jioβά de guidxi Moscú diidxa', stale binni rabi laacabe: «Cadí ladxa ma' bicueezacabe dxiiña' stitu la?». Ora rinabadiidxa' binni nga laacabe, riquiiñecabe ni para gusiénecaabe laaca' ni runi crécaabe. Rihuínnica qué ziuu xiixa ni gucueeza laanu de gucheechenu stiidxa' Reinu. Rinábanu Jioβά uguuru' ndaaya' ca bí'chinu ne ca bizá'nanu de Rusia ne gacané laacabe, purti' ma' bisihuínnicabe dxandí' nadxibalúcabe.



ÑEE RUZÚ'BANU STIIDXA' JIOBÁ ORA RABI LAANU XI NAQUIIÑE' GÚNINU LA?

«Nanaladxe' guirá' neza ni cadí dxandí'.» (SAL. 119:128)

GUINI' íquenu chigúninu ti viaje, peru qué gánnanu modo chindanu ra racalá'dxinu chuunu. Ngue runi gunabadiidxanu ti xhamígunu para gusiene laanu ximodo chuunu. Laabe bisiénebe laanu xi neza guicaanu, peru cadí ngasi, sínuque laaca gudixhenabe laanu de caadxi cosa ni zándaca cueechú laanu de neza stinu. Tobi de caní gúdxibe laanu nga nuu ti seña ni riguite stale binni ora ma' ze' neza que, ne cumu rinándacabe ni la? rinfticabe. Ñee cadí dxandí' ziéchenu purtí' cusiene chaahuibe laanu ximodo chindanu ti cadí guinitinu la? Cadí dxandí' zinándanu ca conseju stibe la? Zacagá nga cayuni Jobá né laanu. Laabe cayábibe laanu xi naquiiñe' gúninu para ganda guicaanu guendanabani ni qué zaluxe. Peru laaca caguixhenabe laanu de caadxi cosa malu ni zanda cueechú laanu de neza ziuunu (Deu. 5:32; Isa. 30:21).

² Lu tema rí' ne lu stobi ca zadú'yanu caadxi de ca cosa ni zanda guniná laanu, peru Jobá caguixhená laanu para cadí guiábanu lúcani, purtí' xhamígube laanu. Ne rúnibe ni purtí' laaca nadxibe laanu stale ne qué racalá'dxibe gácanu gastí' lu neza ziuunu para guicaanu guendanabani ni qué zaluxe. Nabé zusiú'banu ladxido'be pa gudí'nu lugar cueechú ca cosa malu ca laanu de neza ziuunu (Eze. 33:11). Lu tema rí' zadú'yanu chonna de ca cosa ni zándaca cueechú laanu. Primé la? caní runi binni; guiropa, ladxido'no; ne guionna, ca cosa ni na Biblia cadí dxandí', peru nabé malu caní. Caquiiñe' guiene chaahuinu ximódope' nga laacani ne ximodo racané Jobá laanu para cadí guiábanu lúcani. Tobi de ca hombre ni bicaa

1, 2. 1) Xiñee galán guinábanu conseju ante gúninu ti viaje. 2) Xi cayabi Jobá laanu, ne xiñee rúnibe ni.

Biblia guní': «Nanaladxe' guirá' neza ni cadí dxandí'» (Sal. 119:128). Laabe guca nanalá'dxibe guirá' ni ñándaca nucaa laabe nucheenebe Jobá, ñee rúninu zacaca la? Xi zanda gacáné laanu para gaca nanalá'dxinu cosa malu ti cadí guiábanu lu ti neza ra zacananu ya'.

«Cadí chinandu' modo ze' binni»

³ Guxuf' lunu ma' nuunu lu viaje que. Xi gúninu pa qué ganna chaahuinu paneza guicaanu ya'. Zándaca guidú'yanu cayé stale binni lu ti neza ne laaca gacalá'dxinu chinándanu laacabe. Peru cadí jneza dí' nga chuunu ladu que purtí' si ze' stale binni neza que. Zándaca cadí zécabe ra ziuunu, o zándaca laaca cananíticabe. Ejemplu rí' racané laanu guiénenu xi bisiidí' Jobá ca israelita lu tobi de ca ley ni bidiibe laaca'. Tutiica binni che' de testigu o gaca juez ora cayaca juzgar tuuxa, gudxi Dios laa ca diidxa' rí': «Cadí chinandu' modo ze' binni para gúnitu cosa malu. Cadí guidaagulu' laacabe. Ora guini'lu' nezalú tuuxa ni cayaca juzgar la? cadí gucaalu' juez guni ni cadí jneza, purtí' si zacá cayuni xcaadxi binni» (**Éxodo 23:2**). Xiñee gudixhená Dios laacabe ya'. Cumu nánnabe binni rucbee laaca' la? cadí naganá nga gucaa binni laaca' gúnica' ni cadí jneza. Peru cadí ora si cayaca juzgar tuuxa nga naquiiñe' chinándanu conseju ca, sínuque lu guirá' ni gúninu lu xquendanabáninu.

⁴ Guirá' ora nga ridxaagalunu xiixa cosa ni zándaca gucaa laanu chinándanu neza ra ze' xcaaa

3. 1) Xiñee cadí galán chinándanu neza ra ze' xcaadxi binni ora qué gánnanu paneza chuunu. 2) Xi conseju risaca ridú'yanu lu Éxodo 23:2.

4, 5. Xi guendanagana bidxaagalú Josué ne Caleb, ne xi gucané laacabe para bidxiilúcabe ni.



Ñee ruquiinde laanu chinándanu guidxilayú ri' la?

dxí binni. Ne nuu tiru málasí rihuinni caní ne nagana para gudxiilú binni caní. Guiní' íquenu de ní bizaaca Josué ne Caleb. Guirópacabe guyécabe lade grupu de doce hombre ni yeguuya' Layú ni Bizabiruaa Dios gudii laacabe. Chii de laacabe cadí jneza ni guní' dede guleca' gana guidxi que. Dede guní'cabe biiyacabe gigante ni za de ca nefilim, o xhiaga ca ángel ni bidxiideche Jiobá ne bichaganaca' ca gunaa ni nuu Guidxilayú (Gén. 6:4). ¡Nin para guni crelu' laacabe! Pur-tí' qué ñanda ñapa ca nefilim xiiñica' ne ma' gudí'dí' stale siglu de gútica', dxi biaba Nisaguié Naro'ba' que. Ejemplu rí' rusihuinni ti cosa, ora cadí naguidxi nuu fe stí' binni la? runi cré intiisi guendahuati gábicabe laa. Nga nga ni bizaaca ca israelita: bidxíbicabe pur ni guní' chii de ca hombre ni yeguuya' layú que. Dede guní' ique stale de laacabe cadí jneza gucaadiágacabe Jiobá ne chú'cabe lu Layú ni Bizabiruaa Dios. Xi guni Josué ne Caleb yanna pur modo nuu ca binni que ya' (Núm. 13:25-33).

⁵ Josué ne Caleb qué nizaalá'dxica' ni caní' ca binni que ne qué ñúnica' casi cayúnicabe. Neca qué nucaadiaga ca binni que laacabe ne guní'ca' zuchaca' guíe laacabe, bisihuñnicabe dxandí' ni maca gudxi Jiobá laacabe. Xi gucané laacabe para gúcacabe nadxibalú ya'. Fe ni nápacabe. Pur-tí' ora dxandí' napa binni fe la? rudii cuenta jma naquiñe' guni cré guirá' ni ma' guní' Jiobá que guni cré ni riní' si binni. Despué dxi guní' Josué ne Caleb de fe ni nápacá' Jiobá, gúdxica' gui-

rá' ca binni que runi Jiobá guirá' ni ma' guní'. Biblia na: «Laatu nanna dxíchitu de guidubi la-dxido'to ne guidubi xhiálmatu huayaca guirá' diidxa' sicarú ni huayabi Jiobá laatu, Dios stitu. Ma' guca guirácani para laatu. Nin tobi de laacani qué liica huachee» (**Josué 23:14**). Laacabe naxiicabe Jiobá ne runi crécabe laa, ngue runi qué liica nidi'dí' ndaani' íquecabe nuchiichicabe Jiobá ora ñúnicabe ni racalá'dxi' ca binni ni qué gapa fe que. Ne guiruti' qué niguite laacabe. ¡Nabé galán ejemplu bisaanacabe para laanu! (Núm. 14:1-10.)

⁶ Ñee huayuu xiixa ni huayacalá'dxi' gucaa lii chinandu' modo ze' xcaadxi binni la? Ca dxi rí' nuu stale binni ni qué runi respetar Jiobá ne qué rinanda ca ley stibe, ne zacá rihuñnni pur caní rúnicabe para chú'cabe nayeche' ti ratu. Stale binni na gastí' naca gapa tuuxa jnadxii, chuula'dxi' guendaridinde, gu'ya' guirá' ca cosa de brujeríá ridí'dí' lu televisión o lu cine ne lu ca videojuego (2 Tim. 3:1-5). Yanna guinabadiidxanu laca laanu: «Ora ma' cuyube' xi zanda gune' o xi zanda guneniá' binnilidxe' para chu' nayeche' ti ratu, ñee rudiee' lugar gucaa binni naa gune' modo na ne gucaaca' naa guiní' ique' modo riní' íqueca', pur-tí' para laaca' zanda guni binni "guirá' ni gapa gana" la?». Pa gúninu zacá, zusihuñnninu cadí zinándanu conseju ni na: «Cadi chinandu' modo ze' binni».

6. Xi zanda gucaa laanu chinándanu modo ze' guirá' binni.

⁷ Jíobá ma' bisiga'de' laanu ti cosa sicarú ni zanda gacané laanu quixhe íquenu gúninu ni jneza. Laani nga xquendabiaaninu, purtí' racaneni laanu gudí'nu cuenta xii nga ni jneza ne xii nga ni cadi jneza. Para ganda gacané xquendabiaaninu laanu, naquiiñe' guiaani gúnini ni jneza (Heb. 5: 14). Peru qué zaziidí' xquendabiaaninu guni ni jneza pa gúninu guirá' ni runi binni o pa ribézanu gá-bicabe laanu xi gúninu. Nga runi ca testigu stí' Jíobá qué rúnica' nin ti lista ra cá xi película, xi libro o xi yaza stí' Internet cadi gu'ya' binni. Ne nabé nagueenda ruchaa modo nabani binni, purtí' jma stale tiempu riniti para cueecabe ti lista de caadxi cosa que bia' tiempu guindaa ni (1 Cor. 7:31). Ne ndí' nga ni jma triste: pa ñuu ti lista casi ni ma' bizé'tenu ca, ma' qué ñanda nidú'yanu xiná ca conseju ni zeeda lu Biblia, ma' qué ninábanu Dios ñacané laanu ne qué niguijhe íquenu ñúninu ni riuulá'dxibe (Efe. 5:10).

⁸ Cadi guirá' dí' binni ziuulá'dxi' ni quixhe íquenu gúninu ora zinándanu ca conseju stí' Biblia, ne nuu tiru zacalá'dxicabe gucaacabe laanu gúninu ni nácabe. Casi ca hambrehuiini' ne ca dxaapahuiini' xpinni Cristu ni rié scuela, zándaca gabi ca xcompañerucabe laacabe gúnicabe casi rúnica' ne chécabe guirá' ra riega' (1 Ped. 4:4). Peru galán guidú'yanu nuu stale xpinni Cristu —neca nahuiinica' o ma' huaniisica'—, rusihuinnica' nápacá' fe cásica gupa Josué ne Caleb. Zacá rusihuinnicabe zinándacabe mandatu stí' Dios ra na: «Cadi chinandú' modo ze' binni».

Cadi gúnitu ni na ladxido'to ne cadi gúnitu guirá' ni gu'yatu

⁹ Guiroa cosa malu ni zanda guniná laanu riireeni de ndaani' ladxido'no. Guzé'tenu de ejemplu ra caninu ziuunu de viaje que. Xi zazaaca pa qué chinándanu ni cá lu mapa stinu ne gúninu guirá' ni gápanu gana casi guicaanu intiica neza purtí' si riuulá'dxinu modo rihuinni neza que ya'. Zanítinu ne qué zindanu ra rápanu gana. Ejem-

7, 8. 1) Ximodo zanda guizidí' xquendabiaaninu guni ni jneza, ne xiñee jma galán nga que gápanu ti lista ra guicá guirá' ni zanda gúninu. 2) Xi ejemplu rusihuinni stale hambrehuiini' ne dxaapahuiini'.

9. 1) Xiñee cadi jneza guni tuuxa ni ze' de viaje intiica ni gacalá'dxi'. 2) Xi guleendú ca israelita ora bí'nica' ni na Números 15:38, 39.

plu rí' racané laanu guiénuu sti conseju rudii Dios lu Biblia. Zeedani lu tobi de ca mandamientu ni bidii Jíobá ca israelita. Biblia na: «Napa xidé gúnitu caadxi flecu para guicá ñee ca lari rácutu [...] ne napa xidé gucaatu ti listón azul luguia' huini si de ra cá ca flecu ñee xhábatu que [...]. Ne ora gu'yatu cani napa xidé guietenalá'dxitu ca mandamientu stí' Jíobá ne gúnitu ni na cani» (**Números 15: 38, 39**). Zándaca qué ziene stale binni ni nabani yanna rí' xiñee gupa xhaba ca israelita flecu ne ti listón azul. Peru laanu ya', riénuu xiñee risaca ley que la? Ley que bicaani ca israelita gusihuinnica' ma' gadxé laaca' de xcaadxi binni ni nabeza gaxha de ra nuuca'. Ne pa racalá'dxicabe chuulá'dxi' Dios modo runi adorácabe laa la? naquiiñe' gusihuinnicabe ma' gadxé laacabe (Lev. 18:24, 25). Peru nuu sti razón pur bidii Dios ley que. Guidú'yanu xi laani, ti cadi gudí'nu lugar cueechuni laanu de neza ra ziuunu para guicaanu guendanabani.

¹⁰ Guidú'yanu xiná mandatu rí': «Cadi gúnitu ni na ladxido'to ne cadi gúnitu guirá' ni gu'yatu». Bidii Jíobá ley ca purtí' runibia' chaahuiibe ximodo nga laanu. Nánnabe riuulá'dxi' ladxido'no guni guirá' ni ridú'yanu. Nga runi caguixhenabe laanu sicarí': «Ladxidó' binni nga ni jma riguite laa que intiica si cosa, ne qué ridxélanu xi gúnini. Tu zanda gunibia'ni ya'» (Jer. 17:9). Yanna, riénuu xiñee gudxi Jíobá ca israelita cadi gúnica' guirá' ni gu'yaca' ne cadi chinándaca' guirá' ni na ladxido'ca' la? Jíobá nanna zándaca chuulá'dxi' ca israelita modo runi ca binni ni nuu gaxha de laaca' ne zúnica' cásica rúnicabe. Pa puru si ni cayuni ca binni que gu'yacabe, nin qué zandaa zani' íquecabe casi laaca', zácu-cabe lari casi rácuca' ne zúnica' guirá' ni rúnica' (Pro. 13:20).

¹¹ Pur guirá' cani ridú'yanu tiempu rí', zándaca jma nagueenda zaguite ladxido'no laanu. Cumu nabáninu lade stale binni malu la? cadi nagana nga para chinándanu modo rúnicabe. Yanna, ximodo zanda gúninu ni na Números 15:39 ya'. Zándaca ridú'yanu ra scuela, ra rúninu dxiiña' o neza ra nabézanu nuu stale binni racu lari maca para gucaa stobi guini' ique sti cosa. Xi riní' íquenu de laacani ya'. Ora guidú'yanu modo rácu-cabe lari,

10. Xi guní' Jíobá ni rusihuinni dxandí' runibia' chaahuiibe laanu.

11. Ximodo zanda quite ladxido'no laanu pur cani ridú'yanu.

ñee riuuládxinu gúninu zaqueca la? Ñee riuuládxinu chinándanu modo zécabe ne ma' cadi gúninu ni naquiiñe' guni ti xpinni Cristu la? (Rom. 12: 1, 2.)

¹² Nábé risaca nga gánnanu gucueezanu laca laanu. Pa riuuládxinu guuyadxinu ca cosa ni cadi naquiiñe' gú'yanu la? naquiiñe' gúninu ni bíni' Job, purti' laa bíni' ti pactu ne bizalú para cadi gu'ya' sti gunaa ne gacaládxibe laa, sínuque xheelasibe (Job 31:1). Rey David laaca bíni' zaca ora gunf': «Qué zagufxhedía' ni qué zaquiiñe' nezalúá» (Sal. 101:3). Intiica cosa ni guniná xquendabiaaninu ne guxhele' laanu de Jiobá zeeda gácani casi xiixa ni qué iquiiñe'. Nga runi, cadi naquiiñe' guidú'yanu xiixa ni gucaa ladxido'no chuuládxí' cosa malu ne guni nga guché'nenu Dios.

¹³ Zándaca nuu tiru qué zudi'nu cuenta laapenu gueeda gácanu xiixa «ni qué iquiiñe'». Ximodo ya'. Ora chinenu xcaadxi binni xiixa lugar ra gú'yaca' xiixa ni gucaa laaca' chuuládxica' gúnica' cosa

12, 13. 1) Xi naquiiñe' gúninu pa riuuládxinu guuyadxinu xiixa ni cadi naquiiñe'. 2) Xiñee naquiiñe' gúninu stipa para cadi guca'nu xcaadxi chuuládxí' cosa malu.

malu. Zanda gueeda gúninu zacá pa qué chinándanu conseju ra na cadi gácunu «lari ni cadi jneza gacu xpinni Cristu» (1 Tim. 2:9). Para gánnanu pa zanda gacu ti xpinni Cristu xiixa lari, cadi laasinu nga guininu zanda gácube ni. Laaca naquiiñe' guidú'yanu pa qué zúninanu xquendabiaaní' stobi ne pa qué zuchiichinu laaca'. Jma risaca nga guni sentir xcaadxi binni galán ne gatadxí ladxidó' que gúninu guirá' ni riuuládxinu (Rom. 15:1, 2). Galán nga nuu mil de hambrehuiini' ne dxaapahuiini' ni rácuca' lari jneza lade ca binni ridagulisaa. ¡Rié-chenu stale pur laacabe! Rusihuinnicabe cadi zinándacabe ni na ladxidó'cabe ne qué rúnicabe guirá' ni ruuyacabe, sínuque cayúnicabe stipa para guni adorárcabe Jiobá modo riuuládxí'.

«Ne cadi guirecue'tu para chinándatu xiixa ni cadi dxandí'»

¹⁴ Guibigueta' guininu de viaje cayúninu que. Ra zidídinu lu ti desierto rulu' si cadú'yanu ti lugar ra da' nisa. Peru cadi dxandí' da' nisa raqué. Xi zazaacanu pa guiré'chunu de neza ra ziuunu para chuunu neza ra rábinu da' nisa que ya'. Zándaca gueeda guinftinu ne gátinu lu desierto que. Zaca nga Jiobá, laaca nánabe ziábanu lu guenda-

nagana ora chinándanu xiixa ni cadi dxandí'. Ngue runi gudixhena-be ca israelita ora gunábaca' gápaca' ti rey casi napa ca guidxi nuu gaxha de laaca'. Ti pecadu naró'ba' ngue ni canábacabe, purti' cusihuinnicabe ma' qué racalá'dxicabe guni mandar Jiobá laacabe. Nécape' bidii Jiobá lugar gápacabe ti rey, biquiiñebe Samuel para gabi laacabe zápacabe guendanagana pur ni canábacabe. Biblia na: «Ne cadi guirecue'tu para chinándatu xiixa ni cadi dxandí' ra qué zabeendutu gastí' ne ni qué zulá laatu, purti' cadi dxandí' cani» (1 Samuel 12:21).

14. Xi gudxi Jiobá Samuel gabi ca israelita.

Xiñee zápanu guendanagana pa gúninu xiixa sin guini' íquenu





Ñee cuyúbinu «xiixa ni cadi dxandí» la?

¹⁵ Ñee guní' ique ca israelita que jma zanda gacané ti rey ni chu' ládeca' laaca' que bia' racané Jibó' laaca' la? Pa zacá guní' íquecabe la? ma' biábacabe lu trampa de chinándacabe «xiixa ni cadi dxandí'». Ne modo nuucabe rí' jma nagueenda zanda guiábacabe lu xcaadxi trampa stí' Bini-dxaba'. Zándaca gueeda gucaa ca rey que laacabe guni adorárcabe bidó'. Cadi jneza nga ni runi binni ora runi adorar bidó' ne riní' ique zanda gacané ca bidó' de guié ne de yaga laaca' que bia' zanda gacané Dios ni dxandí' laaca'. Jibó' nga bizá' guirá' cosa, ne Pablu guní' «gasti nga ti bidó'» (1 Cor. 8:4). Racá ridú'yanu pur gana si nga nuu ca bidó' ca. Xi zabeendú' binni pa gu'ya' ne cana' laacabe, pa qué ruuyacabe, qué runadiágacabe, qué riní'cabe ne qué zanda gacanécabe guiruti' ya'. Ora runi adorar binni laacabe rusihuinni zinanda xiixa ni cadi dxandí' ne zineni laa lu stale guendanagana (Sal. 115:4-8).

¹⁶ Dede yanna ridxélaru' Binidxaba' modo quite ique binni para gucaabe laaca' chiyúbica' «xiixa ni cadi dxandí'». Rucaabe stale binni guini' ique zabani galán pa gapa stale bidxichi, gapa stale cosa risaca ne gapa ti dxiiña' galán lu guidxilayú rí'. Ne

15. Ximodo ndí' biyubi ca israelita «xiixa ni cadi dxandí'».

16. 1) Ximodo rucaa Binidxaba' stale binni chiyubi «xiixa ni cadi dxandí'». 2) Xiñee rininu «cadi dxandí'» racané bidxichi stí' binni laa pa guchaaganu ni ne modo racané Jibó' laanu.

dxandí' zanda gacané ca cosa ca binni para guni chaahuica' caadxi de ca guendanagana stica'. Peru pabiá' zanda gacanécani laacabe ora gápacabe ti guendahuará malu, ora gueeda guzaabicabe jma de bia' nápacabe ne ora guizaaca xiixa desgracia casi ti xu ya'. Ñee zanda gacané xpuéltucabe laacabe pa qué gánnacabe xi pur nabánicabe ndaani' Guidxilayú rí' la? Ñee zanda gacaneni laacabe para gánnacabe de xiixa cosa ni risaca lu xquendanabánicabe la? Ñee riguixhedxini ladxidó'cabe ora gati ti binnilídxicabe la? Pa lugar de guyúbinu chu'nu jma gaxha de Jibó' guyúbinu gápanu jma bidxichi la? qué zió'dinu nayeche', purti' «cadi dxandí'» cani. Buelto ne ca cosa risaca ca, qué zanda dí' gacanécani laanu para guibáninu jma xadxí, purti' guendahuará ne guendaguti runiná cani guirá' xixenu (Pro. 23:4, 5). ¡Peru Dios stinu ma' gadxé laa! Jibó' huaxa zanda gacané laanu para gatadxí ladxidó'no, ne nánnanu zúnibe ni pa gaca xhamígunu laabe. ¡Ti ndaaya' naro'ba' nga chu'nu gaxha de laabe! Qué chu' dxi guixélenu de laabe pur chiyúbinu «xiixa ni cadi dxandí'».

¹⁷ ¡Nabé riéchenu purti' xhamígunu Jibó' ne purti' cayábibe laanu paneza chuunu! Pa gucaadiáganu guirá' conseju sicarú stibe la? zacaanu guendanabani ni qué zaluxe. Lu tema rí' bizí'dinu chonna cosa ni rucaa binni guni cosa malu, primé la? caní runi binni; guiroa, ladxidó'no; ne guionna, ca cosa ni na Biblia «cadi dxandí'». Cadi guíabanu lu caní, zacatí' nga zanda chindanu ra rápanu gana. Lu sti tema ca zazí'dinu de xhonna trampa ra riaba stale binni. Pa gucaadiáganu ora ma' caguixhená Jibó' laanu de ca neza malu ca, zacaanaládxinu caní ne zúninu stipa pur guixéle-nu de laacani (Sal. 119:128).

17. Xi naquiiñe' quixhe íquenu gúninu.

Xi riní' íquelu'

Ximodo zanda gúninu ni na ca conseju zeeda lu ca textu rí'.

- Éxodo 23:2
- Números 15:38, 39
- 1 Samuel 12:21
- Salmo 119:128

ÑEE ZUCAADIÁGANU JIOBÁ ORA QUIXHENÁ LAANU LA?

«Ndi' nga neza ca. Lasá luni.» (ISA. 30:21)

GUZÉ'TENU de ejemplu ra ziuunu de viaje ni gu-ninu lu primé tema que. Guini' íquenu ziuunu lu carretera, ne raqué ridú'yanu ti seña ni culuf' laanu ti neza gadxé de ra chuunu. Pa chuunu neza ra culuf'ni que, zunfitinu tiempu ne zagú'nu xquendabáninu ra naxoo. ¡Galán nga gudxi ti xhamígunu laanu cadi chuudinu neza ra culuf' seña que, purtí nuu ti binni ni guluuni raqué para quítebe cani che' neza que! Zinándanu ni gudxi xhamígunu laanu ne qué zaní' íquenu ni chupa biaje.

² Tuu nga zeeda gaca casi binni ni bichaa seña ni bizé'tenu lu ejemplu ca ya'. Binidxaba', purtí' laa racalá'dxi' guinfítinu neza ra ziuunu (Apo. 12:9). Racalá'dxibe cueebe laanu de lu neza ra zacaanu guendanabani ni qué zaluxe, ne para gúnibe nga riquiñebe caadxi cosa ni zeeda gaca casi seña biquiñe' hombre ni bizé'tenu ca. Ne lu tema gudídinu ca bidú'yanu chonna de cani riquiñebe para cueechube laanu (Mat. 7:13, 14). Peru galán nga nápanu ti binni ni nabé xhamígunu ni caguixhená laanu de ca trampa ca, laabe nga Jobá. Peru riquiñeru' Binidxaba' stale trampa. Guidú'yanu xhonna de laacani. Ora guidú'ndanu ximodo racané Biblia laanu para cadi quite Binidxaba' laanu la? zeeda gácani casi ora nuzuhuaa Jobá neza déchenu ne ñabi laanu paladu nga jma jneza chuunu né ca diidxa' rí: «Ndi' nga neza ca. Lasá luni» (Isa. 30:21). Galán guini' íquenu pabiá' nayaguie' modo riguixhená Dios laanu, purtí' zacá qué zaré'chunu de neza stibe.

Guixéleno de cani rusiidi' «ni cadi dxandí' zeeda de Dios»

³ Guibigueta' guzé'tenu de biaje cayúninu que. Zándaca ora tiidinu lu ti pampa guidú'yanu rihui-nni ti bizé zitu de ra nuunu que. Oraqueca ziuunu

1, 2. Xi cá ique Binidxaba' guni laanu, ne ximodo racané Stiidxa' Dios laanu.

3, 4. 1) Xiñee rininu zeeda gaca ca maestru ni qué rusiidi' ni dxandí' casi bizé ni nabidxi. 2) Padé riree ca maestru ni qué rusiidi' ni dxandí', ne xi racalá'dxicabe gúnicabe.

ra nuu ni purtí' guizá' ma' cayátinu nisa. Peru ora chindanu ra nuu bizé que rudi'nu cuenta nabidxi ni. ¡Triste si ziaananu óraque! Zanda guininu zeeda gaca nisa ca guirá' ni rusiidi' Biblia, ne ca maestru ni qué rusiidi' ni dxandí' ca zeeda gáca' casi bizé ni nabidxi que. Binni ni rié ra nuucabe para gusiidicabe laaca' ni zeeda lu Biblia, ngueca si rusaanacabe laaca'. Peru Jobá caguixhená laanu para cadi chiguíabanu ndaaní' ná' ca binni ca, ne biquiñebe Pablu ne Pedru para bí'nibe ni (**biinda' Hechos 20: 29, 30 ne 2 Pedro 2:1-3**). Guidú'yanu ca conseju bicaacabe ti gudí'nu cuenta tuu nga ca maestru ni qué rusiidi' ni dxandí', padé zeedacabe ne ximodo rúnicabe dxiña.

⁴ Sicarí' gudxi Pablu ca binnigola ni nuu Éfeso: «Dede lade ca tu ziuu tu guiasa usiguui ca xcaadxi para chi nanda laaca'». Ne Pedru bicaa ra nuu ca bí'chi' ne ca biza'na': «Ziuu tu usiidi laatu ni cadi dxandí' zeeda de Dios». Ma' bidú'yanu padé zeedacabe la? Stale biaje riree ca maestru ca de lade ca binni ridagulisaa. Laacabe nga ca binni ni ma' bixele' de Dios ne rucaaluca' xquídxibe. Xi racalá'dxicabe gúnicabe ya'. Qué rusaanasicabe xquidxi Dios ni zándaca gunnaxhiicabe dxiqué. Pablu bisihuinni xipe' nga racalá'dxicabe: «Para [gucaacabe ca *discípulo*] chi nanda laaca[be]», casi ora nixubiyúcabé laaca'. Zacá nga laani, ca binni ni ma' bixele' de Dios racalá'dxica' guireeneca' caní ma' naca discípulo stí' Cristu. Qué ruyubidicabe xpínnicabe lade caní qué runi cré Dios, sínuque de lade ca binni ridagulisaa ruyúbicabe binni chinanda laacabe. «Naduxhu cabe casi gueu'», ne racalá'dxicabe guxuuxecabe ca xpinni Cristu ni canayasi, ra gusrácabe fe stica' ne cueecabe laaca' lu neza ra caziidica' ni dxandí' (Mat. 7:15; 2 Tim. 2:18).

⁵ Ca maestru ni qué rusiidi' ni dxandí' nabé n-xhenaca' para gúnica' dxiña. Biblia na naga'chí' modo zaguítecabé ique ca xpinni Cristu, cáscica runi ti binni malu para gutoo xiixa ndaaní' stí

5. Ximodo runi ca maestru ni qué rusiidi' ni dxandí' dxiña.



Ximodo zanda chu'ca binni ni ma' bidxiideche Dios ndaani' lídxinu

laanu, o rápacabe gana guni crenu guirá' ni rusiidicabe (1 Tim. 6:3, 4). Racá ridú'yanu maca gudixhe Dios xi cadí naquiñe' gúni-nu, peru ñee laaca ma' gudixhe íquenu chinándanu ni nabe guirá' ora la?

⁷ Ximodo zanda guixéleno de ca maestru ni qué rusiidí' ni dxandí' ya'. Ra qué guinínenu laacabe ne cadí gudí'nu lugar chú'cabe ralídxinu. Qué liica ridú'ndanu ca libru ne revista stícabe, ne qué rucaadiáganu guirá' ni rutiidicabe lu televisión o lu Internet, ne laaca qué ruca'nu xi riní' íquenu lu ca yaza ni nápacabe lu Internet. Xiñee ma' gudixhe íquenu guixéleno de laacabe ya'. Primé la? purtí' nadxiinu Jobá, «Dios ni dxandí'». Nga runi, qué liica riza-

guidxi, naga'chí' modo riguube cani. Racalá'dxicabe guiní' íque ca binni ridagulisaa modo riní' íquecabe sin gudiica' cuenta. Ne casi racalá'dxi' tuuxa guicaa binni ca billete ni qué ridí'dí' la? zacaca nga racalá'dxi' ca maestru ni rusiguui ca guacaacá' laanu guni crenu «intiica ni cadí dxandí'». Riguucabe guirá' «ni nadxabá'» cá íquecabe ne «adxé modo» rusiñecabe caadxi textu para gudiicani modo riní' íquecabe (2 Ped. 2:1, 3, 13; 3:16). Rihuinni dxíchica cadí cuyúbicabe chu'nu galán. Pa chinándanu laacabe la? zabeechuscabe laanu de neza ra ziuunu para guicaa-nu guendanabani ni qué zaluxe.

⁶ Ximodo zanda gápanu laanu ya'. Ra chinándanu ca conseju rudii Jobá laanu (***biinda' Romanos 16:17 ne 2 Juan 9-11***). Biblia canaba' ca xpinni Cristu guixéleca' de ca binni ni ma' bidxiideche Dios, o casi na xcaadxi Biblia «lachu u zitu de laacabe» ne pa ganda dede «laguxooñe' de laacabe». ¡Guizá' naya-guie' modo cayabi Dios laanu xi naquiñe' gúninu! Xi rúninu ora guni mandar ti doctor laanu cadí chu'nu gaxha de tuuxa ni napa ti guendahuará' malu ni ricá ni zanda guuti laanu ya'. Pa gábibe laanu xiixa zacá, qué zani' íquenu chupa biaje para chinándanu ni gúdxibe laanu. Jobá zeeda gaca casi ti Doctor Cha'hui', ne cayuni mandar laanu cadí liica guidxaaganu tutiica maestru ni qué rusiidí' ni dxandí'. Xiñee ya'. Purti' zeeda gáacabe casi ti binni ni napa ti guendahuará' malu ne racalá'dxicabe guacaacabe ni

6. Xi mandatu cudii Biblia laanu de ca maestru ni qué rusiidí' ni dxandí'.

lá'dxinu guirá' ni riní'cabe para gucaalúcabe ni rusiidí' Stiidxa' Dios (Sal. 31:5; Juan 17:17). Guiropa razón nga purtí' nadxiinu xquidxi Dios, ni ma' bisiidí' laanu caadxi cosa casi tu lá Dios ne xi riní' labe, xi pur guyá' Guidxilayú, ximodo nuu ca gue'tu' ne nánnanu zadxiña dxi gusibani Dios laacabe. Ñee rietenalá'dxinu ximodo bí'ni' sentirnu primé biaje bisiñecabe laanu ca cosa sicarú' ca la? Yanna, xiñee ndí' gucaadiáganu ca binni ni ma' bixe'le' de Dios, cani xcustu guiní'ca' mal de guidxi ni ma' bisiidí' laanu stale cosa ya'. Zucaasícabe laanu gutópanu xiana ndaani' ladxido'no cásica nuucabe (Juan 6:66-69).

⁸ ¡Zanda guiní' ca maestru ni qué rusiidí' ni dxandí' guirá' ni gápaca' gana! Qué liica zulábinu laaca. Xiñee ndí' gúninu ni ya'. Zeeda gáacabe casi bizé ni qué gapa nisa, zusiguuiscabe laanu ne zuchiichicabe laanu. Ma' gudixhe íquenu cadí guixéleno de Jobá ne de xquidxi. Guidxi ri' qué huayuu dxi gusaanatá' laanu ne rusiidí' laanu stale cosa sicarú' ni cá lu Biblia ni zeeda gaca casi nisa nayá (Isa. 55:1-3; Mat. 24:45-47).

Guixéleno de ca «cuentu yooxho'»

⁹ Ora ma' ziuunu lu ti carretera, nuu biaje ridú'ya-

7, 8. 1) Guná' nga ca modo rixéleno de ca maestru ni qué rusiidí' ni dxandí'. 2) Xi razón napu' para quixhe íquelu' gucaanalú' ca maestru ni qué rusiidí' ni dxandí'.

9, 10. Ximodo gudixhená Pablu Timoteu, ne xi «cuentu yooxho'» ngue zándaca caní' íquebe. (Biyya' nota ni cá ñee sti yaza ca.)

nu ti seña ne nagueendaca rudi'nu cuenta ma' bi-chaacabe ni purti' culu'i'ni laanu chuunu sti ladu ni cadi jneza. Peru ziuu biaje zaca nagana para laanu gudí'nu cuenta de laani. Ngaca nga ni rizaaca né ca trampa sti' Binidxaba': nuu caní jma nagueenda zaquite caní laanu que xcaadxi. Lade caní huaxi' rihuinni nuu ca «cuentu yooxho'» o «irá cuentu ribee ca judíu» (*biinda' 1 Timoteo 1:3, 4*; zanda gú'ndalu' Tito 1:14). Pa qué racalá'dxinu guire'nu de lu neza ra zacaanu guendanabani ni qué zaluxe la? naquií'ne' ganna chaahuinu xii nga ca cuentu ni bizeete' Pablu ne xi zanda gúninu para cadi quite caní laanu.

¹⁰ Primé carta ni gucuá ra nuu Timoteu nga caguixhená laanu de ca cuentu yooxho' ca. Lu carta ca caguu Pablu gana binnigola que para gu'ya' chu' ca xpinni Cristu nayá nezalú Dios ne gacanebe laaca' guzuhuaaca' dxiichí' (1 Tim. 1:18, 19). Diidxa' griegu ni biquií'ne' Pablu ora guní' de ca «cuentu yooxho'» riní'cani de ora «cusiguii tuuxa» ne ora «ruzá' si tuuxa ti historia». Ti libru na laani nga ti historia ni qué zanda guni cré binni purti' cadi dxandí' ni (*Diccionario exegetico del Nuevo Testamento*). Zándaca caní' Pablu de «irá cuentu ribee ca judíu» ni zeeda de historia yooxho' bizá' binni ni nabé riuulá'dxí' binni gucaadiaga.* Pablu na rucaa ca historia rí' binni guinabadiidxa' stale cosa. Xií'nee ya'. Purti' ora gunadiaga binni caní rucaacani laaca' cueeca' tiempu para gu'yaca' pa dxandí' caní. Ngape' nga trampa ni jma riuulá'dxí' Binidxaba' iquií'ne' para quite binni. Zacá nga laani, laabe nabé riquií'nebe stale cosa ni cadi dxandí' ni rusiidí' stale religión para gusiguiibe caní nayaaguí'. Nga runi, qué gápanu paraa quiñeyunu conseju ni bidii Pablu rí': ¡Cadi gulábitu ca cuentu ca!

¹¹ Xi cuentu ndí' zándaca quite laanu pa qué gatananu ya'. Zanda guininu zeeda gaca ca «cuentu yooxho'» ca intiica historia o xiixa cosa ni cadi dxandí' rusiidí' ca religión. Ñee zanda guninácani binni la? Biblia na pur laacani «zudxii deche [stale binni] ni zeeda de Dios» (2 Tim. 4:3, 4). Binidxaba' «rutiidi laa casi tobi ni zeeda de Dios», ne riquií'nebe religión ni

* Guzé'tenu ni cá lu tobi de ca libru ni cadi zeeda lu Biblia: Tobías (o Tobit). Libru rí' gucuani lu guionna siglu ante de ca dxi sti' Jesús ne nabé runibíá' binni ni dxi bibani Pablu. Laani ruzeeteni casi ora dxandí' stale historia de magia ne brujeríá (biíya' *Perspicacia para comprender las Escrituras*, volumen 1, yaza 154 ne 155).

11. Ximodo riguite Binidxaba' ique binni ora riquií'nebe religión ni cadi dxandí', ne xi conseju zacáné laanu para cadi quítebe laanu.

cadi dxandí' para quítebe binni (2 Cor. 11:14). Ca religión ca rusiidica' stale cosa ni cadi dxandí' ne rúnicabe ni casi ora ñaca Biblia rusiidí' caní, caadxi de caní rusiidicabe nga Trinidad, nácabe napa binni ti alma ni qué rati ne laaca rusiidicabe nuu ti infiernu ra raca castigar binni. Laaca rucaacabe binni guni saa casi Navidad ne Nabaana, ne stale de ca saa ca rulu' cadi malu caní, peru bireecani de cuentu ne de ca religión ni qué rusiidí' ni dxandí'. Para cadi quite ca cuentu ni cadi dxandí' casi caní ma' bizé'tenu ca laanu la? cadi gusaananu de chinándanu conseju ni cudii Jobá rí': «Laixele de laacabe, ne cadi cana tu ni cadi nayá para naa» (2 Cor. 6:14-17).

¹² Binidxaba' laaca riguite ique binni de xcaadxi modo, ne pa gásinu la? zanda quite caní laanu. Guidú'yanu chonna de laacani. Primé guendarusiguii: *Zanda gu'nu' guirá' ni gapu' gana. Lii nga guini'lu' xii nga jneza ne xii nga ni cadi jneza para lii*. Runadiaganu riní' binni zacá lu televisión, lu stale película ne revista, lu periódicu ne lu Internet. Cumu guirá' si ora cayunadiaganu ni la? zanda guzulú guini' íquenu zacá ne gululá'dxinu chinándanu modo ze' binni guidxilayú. Peru binni rucbee laanu, nga runi caquií'ne' gabi Dios laanu xii nga jneza ne xii nga ni cadi jneza, ne Jobá si nga zanda guni ni (Jer. 10:23). Guiroa guendarusiguii: *Qué ziuu dxi guni chaahui' Dios ca guendanagana napa binni*. Stale binni riní' ique zacá, nga runi nabánica' para yannadxi si. Pa guini' íquenu zacaca la? ma' qué zúninu xhií'na' Dios né stale gana ne zusihuí'nninu «pur gana si runibíá' [nu] laabe» (2 Ped. 1:8). Peru nabé nagueenda cadxiña dxi sti' Jobá, ne naquií'ne' gatananu ora guedandá ni (Mat. 24:44). Guionna guendarusiguii: *Qué rizaala'dxi' Dios naa*. Binidxaba' racalá'dxi' guini' íquenu qué zanda dí' gannaxhii Dios laanu, ne pa guni crenu ni la? zucaani laanu gusaana de guni adorarnu Dios. Peru nadxii Jobá cada tobi de ca xpinni ne ruisácabe laaca' (Mat. 10:29-31).

¹³ Naquií'ne' gatananu ne guxhelelunu. Cadi guiaanda' ndí' laanu: zándaca primeca biaje guendiáganu modo riní' binni guidxilayú ne ora gu'yanu ni rúnica' chuulá'dxinu caní. Yánnape' nga jma caquií'ne' gucaadiaganu ca conseju ne modo caguixhená Stiidxa' Dios laanu. Zacatí' nga qué zaguite

12, 13. 1) Xi chonna guendarusiguii rucaa Binidxaba' guini' ique binni, peru xii nga ni dxandí'. 2) Xi naquií'ne' gúninu para cadi guíabanu lu ca cuentu ni biree si de xiga ique binni.

Binidxaba' laanu ne qué zíabanu lu cuentu ni biree si «de xiga ique» binni (2 Ped. 1:16).

Cadi gudí'nu lugar «gutiixhi Binidxaba' íquenu»

¹⁴ Guzé'tenu ejemplu ra ziuunu lu carretera que sti biaje. Pa nidú'yanu ti flecha ra na: «Cherí' rié guirá' cani zinanda' Binidxaba'», ñee ñuunu neza ra culu' flecha ca la? co', nja'. Qué liica nini' íquenu ñuunu neza que. Peru Pablu guní' zándaca gueeda guireechú ti xpinni Dios purtí' «bitiixhi binidxaba ique» ne guzulú chinanda Binidxaba' (**biinda' 1 Timoteo 5:11-15**). Conseju ri' bidiibe ni «ca viuda nahuiini ru'», peru laaca zanda guizí'dinu stale de laani. Ca gunaa xpinni Cristu ni bibani lu primé siglu ri', qué gánnaca' pa ma' zinándaca' Binidxaba', peru ngue nga ni cusihuínnicabe né guirá' ni rúnicabe. Tobi de laacani nga nabé rini'cabe chisme. Guidú'yanu xi conseju bidii Pablu de laani, purtí' zacanení laanu para cadi chinándanu Binidxaba' sin gudí'nu cuenta.

¹⁵ Ni jma ñuula'dxi' Binidxaba' nga nucaa laanu nusaana de nucheechenu ca diidxa' nacubi ne galán (Apo. 12:17). Cumu qué racalá'dxibe gusí'dinu binni de fe ni nápanu la? ruyúbibe ximodo gunítinu tiempu stinu lu xcaadxi cosa o dede ruyúbibe modo gutí'ndebe laanu. Ngape' nga ni bí'nibe né ca viuda ni bibani lu primé siglu que. Ca diidxa' guní' Pablu que rusihuínnicani biábacabe lu caadxi trampa sti' Binidxaba'. Primé la? «*riaa cabe enda nachaaba', ma canazá cabe yoo pur yoo*». Ca viuda ri' biquiíñeca' stale tiempu stica' para chigánnaca' ca xhamíguca' ne güica' diidxa' de xiixa ni qué risaca. Naquiíñe' gatatanu ti cadi gúninu zacaca. Xiñee ya'. Purti' zándaca sin gudí'nu cuenta guzulú gunítinu stale tiempu stinu para guca'nu xiixa mensaje ra nuu tuuxa o para guidú'ndanu xiixa ni bicaacabe ra nuunu, nuu nda' tiru cadi dxandí' ni bica'nu o cadi dxandí' ni cayábicabe laanu. Cumu cadi guirá' dí' biaje caquiíñe' guca'nu xiixa mensaje la? zunítisinu tiempu stinu, peru laaca zabeenu tiempu sti' sti binni pa gúninu zacá. Guiropa la? ca viuda que ma' biaaca' guini'ca' chisme o ma' «*[b]iziidi cabe uchá cabe cuentu*». Pa guzulú guininu ti chisme de tuuxa la? zucaa nga laanu guininu mal de laabe ne pur laani ma' tindenenu ca bí'

14. Ximodo gudixhená Pablu caadxi viuda nahuiinigarú, ne xiñee cadi naquiíñe' gusiá'ndanu conseju ca.

15. Xi racalá'dxi' Binidxaba' gúninu, ne ximodo ca guixhená Pablu laanu de ca trampa ni riquiíñebe.

Xi rini' íquelu'

Ximodo zanda gu'nu' ni na ca conseju ri' lu xquendanabánilu'.

- 2 Pedro 2:1-3
- 1 Timoteo 1:3, 4
- 1 Timoteo 5:11-15

chinu ne ca bizá'nanu (Pro. 26:20). Pa rudii ca binni ni rini' mal de stobi cuenta, o pa co' la? ma' zinándaca' modo runi Binidxaba'.* Ne último la? ca viuda que «*riguu ruuaa cabe ratiisi*». Guiruti' qué gapa derechu para sa' guini' ne gabi xcaadxi binni xipe' nga naquiíñe' gúnica' né xquendanabánica'. Pa gueeda gúninu tobi de guionna' ni bizé'tenu ca la? cunítinu tiempu ne ndí' nga ni jma feu: zutíndenu binni, purtí' ma' canagudxiga xquíchinu laaca'. Peru cadi ngasi, laaca ma' qué zuchechenu diidxa' de guidubi ladxido'no, nga nda' nga dxiiña' risaca bisaanané Jobá laanu. Ora gúninu zacá ma' cayu'nu' pur Binidxaba', ne ma' cucá'lunu Dios. Nga runi, naquiíñe' cuinu tu pur chu'nu (Mat. 12:30).

¹⁶ Xi zanda gacané laanu para cadi gutiixhi Binidxaba' íquenu ne chinándanu laa ya'. Ra gúninu ni na conseju ni zeeda lu Biblia. Guidú'yanu caadxi conseju galán bidii Pablu ca bí'chi' ne ca biza'na'. Laabe guní'be: «*Qué chu' dxi usaana tu de guni tu xhiíña Señor bia' ra ganda tí*» (1 Cor. 15:58). Pa gucheechenu stiidxa' Reinu né stale gana la? zacané nga laanu para cadi gácanu binni nachaaba' ne gunítinu tiempu stinu (Mat. 6:33). *Naquiíñe' guini'tu «diidxa jneza ni zanda acané stobi uzuhuaa chaahuí'»* (Efe. 4:29). Cadi naquiíñe' gucaadiáganu o guininu xiixa ni cadi dxandí' de sti binni.* Naquiíñe' gúninu stipa pur guni crenu ni rini' ca xpinni Cristu ne guni respetarnu laaca'. Galán iquiíñenu diidxa' ni uguu gana laacabe ne ni gacané laacabe iguidxi fe stfcabe, cadi ni gusaba laacabe. «*Laucaa ique xhiíña si tu.*» (1 Tes. 4:11.) Nécape' naquiíñe' guizaalá'dxinu ximo-

* Diidxa' *Diablo* zeedani de diidxa' griegu *diábolos*, ne riní'ni «tuuxa ni riní' xiixa ni cadi dxandí' de stobi». Laani nga tobi de ca lá ni rudiicabe Binidxaba', purtí' laa nga binni ni jma rusiguii (Juan 8:44; Apo. 12:9, 10).

* Biiya' cuadro ra na «Duubi' ni ziné bi».

16. Guná' nga ca conseju ni zacané laanu para cadi guiábanu lu trampa sti' Binidxaba' ne chinándanu laa.

do nuu xcaadxi binni la? laaca napa xidé guni respertanu modo nabánicabe ne guidú'yanu laacabe casi ti binni ni risaca. Laaca cadi naquiiñe' guca'nu laacabe gúnicabe xiixa modo riuulá'dxinu gácani pa laacabe nga naquiiñe' gú'yacabe xi zanda gúnicabe (Gál. 6:5).

¹⁷ ¡Riéchenu stale purti' nayaguie' modo cayabi Jobá laanu xi cadi naquiiñe' gúninu! Lu tema rí' ne

17. 1) Xiñee caguixhená Jobá laanu. 2) Xi naquiiñe' quixhe íquenu gúninu.

lu ni gudídinu ca bidú'yanu caadxi modo caguixhebabe laanu. Qué chu' dxi gusiá'ndanu xiñee bidiibe cani laanu: purti' nadxiibe laanu stale ne qué racalá'dxibe gacananu pur chiná'danu ni na Binidxaba'. Zándaca zaca nagana para sanu lu neza sti' Jobá, peru laasini nga zineni laanu ra zanda guicaanu guendanabani ni qué zaluxe (Mat. 7:14). Nga runi, naquiiñe' guni crenu ni guirá' ora ne chiná'danu conseju rí': «Ndi' nga neza ca. Lasá luni» (Isa. 30: 21).



Duubi' ni ziné bi

Nuu ti cuentu yooxho'stí'ca judú ni rusihuinni pa-biá' feu nga guini'cabe ti chisme de tuuxa. Nécape' nuu stale modo rin'cabe cuentu ca la? ndí' nga ni rin'cabe:

Guyuu ti hombre ni bizulú guní' stale cosa ni cadi dxandí' de ti hombre nuu xpiaani' ni nabeza ndaani' ti guidxi. Despué bidii chismoso que cuenta cadi jneza ni bí'ni'. Ngue runi guyebe ra nuu hombre nuu xpiaani' que para guiná'babe laa gutiidilá'dxi' stóndabe ne gúdxibe laa gabi laabe xi zanda gúnibe para guxhiabe ni bí'nibe. Hombre nuu xpiaani' que gunaba' laabe ti cosa sí: guicaabe ti almuhada, guichézabe ni né ti gudxiú ne gúsá'bibe guirá' duubi' dxa' ndaani' ni lu bi. Bidxagayaa chismoso que ni gúdxibe laa, peru bí'ni' ni. Despué bibiguétabe ra nuu hombre nuu xpiaani' que ne gunabadiidxabe laa:


—Ñee ma' bitii'lá'dxilú' donda stinne' la?

—Primeru naquiiñe' chitópalu' guirá' ca duubi' ca —na hombre nuu xpiaani' que.

—¡Peru qué zanda dí' gune' nga! Ma' ziné bi guirá' duubi' ca —na chismoso que.

—Pue zacaca nga qué zanda guni chaahuilu' ni bí'nilu' pur guirá' ni guni'lu' —bicabi hombre nuu xpiaani' que.

Nayaguie' ni rusiidí' cuentu rí' laanu: ora ma' bindaa ruaanu xiixa la? ma' qué zanda dí' gudxiguétanu ni, ne stale biaje ma' qué randa runi chaahuinu modo bininanu tuuxa. Nga runi, ante guininu xiixa de tuuxa la? quietenalá'dxinu mayaca gunda'nu caadxi duubi' lu bi.



QUÉ RIDXIBE' GATE', MA' CABEZA' GUICAA' GUENDANABANI

PIERO GATTI
GUNÍ NI BIZAACA

CUMU zíturu' zeeda ca avión que la? huaxié' runadiágadu ridxi stícani, peru laga zidxiña caní, jma ma' nadipa' ridxi stícani. Ora bizulú ca-xidxi ca sirena que bidídu cuenta naquiñe' gu-xóñedu para chuudu ndaani' ca lugar ra zanda guiladu. De raqué ma' bizulú cayaba bomba dede bia' qué gusicuaatásica' diaga binni, guizá' bichibi caní binni ne cunitilú caní guidubi guidxi Milán.

Nga nga ni cayaca ndaani' guidxi Italia lu iza 1943 ne 1944. Ca iza que ma' naca' ti hombre-huiini' ne nuaa' de soldadu raqué. Stale biaje yetopa' ca gue'tu' ni biaana ra bininá ca bomba que, o ni guidxela' de ca gue'tu' nuu lade ca escombros que. Guyuu biaje dede bilá né naa ñate' ca lugar que. Cada biaje gune' sentir ma' bia' bia' qué gatesiá, rabe' Dios, pa guila'ya' la? zudiee' laa guendanabani stinne' para gune' ni na.

Ximodo nga ma' qué nidxibe' guendaguti

Biniise' ndaani' ti guidxi sti' Italia ni riaana bia' 10 kilómetru de guidxi Como, gaxha de ra dxaagani Suiza. Cumu stale cosa triste nga gudide' dxi guca' bádu' la? bidxibe' guendaguti. Guti chupa bizana' de gripe española, ne jñaá, Luigia, guti lu iza 1930, dxi deru' napa' xhoopa' iza. Cumu católicu ca binni bisiniisi naa la? ngue runi ríaa' mixa' guirá' semana ne rune' guirá' ni rusiadicabe ra yúdu' que. Peru cadi raqué dí' nga bisaana' de guidxibe' guendaguti, sínuque ti lu-

gar ra rugácabe guicha ique binni, ne guca nga gudi'di' si stale iza despué.

Dxi cayaca guiropa guendaridinde lu guidubi naca Guidxilayú lu iza 1944, nabé bininá ni guidxi Italia. Stale mil soldadu de Italia bixooñeca' de ra cadíndecabe que ne geyeca' Suiza, naa laaca nuaa' ládecabe. Yendásidu raqué, biseendacabe laadu ca lugar ra rigucabe binni ni cuxooñe' de xquidxi. Biseendacabe naa ti lugar ni nuu ladu guia', gaxha de Steinach, raqué rudiicabe lugar gúnidu caadxi cosa. Peluqueru ni nuu ndaani' guidxi que gudxi naa guneniá' laa dxiiñá' ti tiempu ne bidiibe lugar guiaana' de biuuzá' ralídxibe. Nécape' ti beeu si bine' dxiiña' raqué, gunda binebia'ya' ti binni ni bichaa xquendabane'.

Laabe nga Adolfo Tellini, tobi de ca binni ni nabé rié ra nuu peluqueru que, de Italia laabe ne nápage lídxibe Suiza ne nácabe testigu sti' Jio-bá. Qué liica ganna' tuu nga ca Testigu, ne cadi guendaridxagayaa dí' ni, purti' para iza que ti gayuaa cincuenta si Testigu nuu guidubi guidxi Italia. Bisiidí' Adolfo naa stale cosa sicarú zeeda lu Biblia, peru ni jma guyuuladxé' nga ra caní'ni de ti guidxilayú cubi ra ma' qué zadinde binni ne ra zapa binni «enda nabani» ni qué zaluxe (Juan 10:10; Apo. 21:3, 4). Bieche' stale ora gunna' zadxiña dxi guiluxe guendaridinde ne ma' qué ziuuru' guendaguti. Bibiguétasia' de lugar ra yesaanacabe naa que, bidxaaga' ti hombrehuiini' de Italia ni lá' Giuseppe Tubini, gudxe'

laabe guirá' ni ma' biziide' ne laaca nabé guyuu-
ládxibe cani. Dede dxi que, ma' gatigá riganna
Adolfo ne xcaadxi xpinni Cristu laadu.

Ti dxi yené Adolfo naa ti guidxi lá' Arbon, riaa-
nani 10 kilómetru de Steinach, ra nuu ti grupu
de Testigu, laacabe rúnicabe guendaridagulisaa
stícabe lu diidxa' italiano. Nabé guyuuladxé' ni
bicaadiaga' raqué, ngue runi guyaa' sti semana
que, neca biaje que gupa xidé guzaya' para ye-
ndaya' raqué. Despué guyaa' ti guendaridaguli-
saa ro' ni guca Zurich. Ni jma biaana lu xquenda-
biaane' nga caadxi foto bitiidicabe sti' ca lugar ra
ruseeguyocabe binni para gati. Gudi'dí' caadxi
foto ra rihuinni modo rí' gue'tu' ne ora cadí'dí'
cani bisiéncabe guti stale xpinni Cristu de Ale-
mania raqué pur fe stica'. Lu guendaridagulisaa
que binebia'ya' Maria Pizzato, gunaa rí' Testigu
laa, peru biseeguyoo gobiernu fascista sti' Italia
laabe once iza pur cani runi crebe.

Biluxe si guendaridinde que bibigueta' Italia
ne bizulú guyaa' lade ca binni ridagulisaa de
guidxi Como. Nécape' qué huayuundanécabe
naa Biblia modo naquiiñe' gácani la? ma' nanna'
caadxi de cani naquiiñe' guiziidi' binni primé.
Lade ca binni ridagulisaa que nuu Maria, ne gú-
dxibe naa risaca nga chuaanisa' ne laaca gúdxibe
naa chiganna' Marcello Martinelli, ti xpinni
Cristu ni nabeza Castione Andevenno, ti muni-
cipiu ni nuu lu provincia sti' Sondrio. Xpinni
Cristu ni bibí rí' laaca biseeguyoo gobiernu ni ca-
yuni mandar que laabe once iza. Gupa xidé gu-
zaya' 80 kilómetru né bicicleta para yeguuya'
laabe.

Biquiiñe' Marcello Biblia para bisiene naa xi
naquiiñe' guné' para chuaanisa', bí'ni' orarnebe
naa ne yenebe naa ndaaní' guigu' Adda, ne ra-
qué guluunísabe naa. Qué ziuu dxi guiaanda'
naa dxi sti' beeu septiembre iza 1946 que. Guizá'
cayeche' ora yendaya' ralidxe' gueela' que, dede
nin qué ñune' sentir pa bisaya' bicicleta que
160 kilómetru ti dxi si.

Biluxe si guendaridinde que guca primé
guendaridagulisaa ro' ndaaní' guidxi Milán lu
beeu mayo iza 1947. Guyé 700 binni raqué ne

ládecabe nuu stale de cani bilá dxi guzananda
gobiernu fascista que laaca'. Lu guendaridagu-
lisaa que guca xiixa ni nabé bidxagayaadu. Xi
laani ya'. Giuseppe Tubini, hombrehuini' ni
bisiide' laa de Dios dxi nuua' ra biseeguyocabe
naa que, bidii libana para cani chichuuni-
sa... ¡bilúxesibe libana que gulunísabe laca
laabe!

Raqué binebia'ya' Nathan Knorr, ni runi dxii-
ña' Betel ni nuu Brooklyn. Gúdxibe naa ne Giu-
seppe quixhe íquedu gúnidu jma lu xhiiña'
Dios, ne bine' ni gúdxibe laadu que gudi'dí' si ti
beeu. Ora bibigueta' ralidxe' ne gudxe' ni ca bi-
nnilidxe' la? gualádxica' nibeeca' gana naa,
peru qué nudiee' lugar ñúnicabe ni. Gudi'dí' si ti
beeu guyaa' Betel ni nuu Milán para guné' dxii-
ña'. Ca dxi que nuu chupa guendaxheela' ni
naca misioneru Betel —Angelina ne Giuseppe
(Joseph) Romano, ne Costanza ne Carlo Benan-
ti— ne Giuseppe Tubini, ni nacubi yendá raqué.
Ne naa biza'du xhoopa'.

Sti beeu que beeda gaca' binnigola ni riganna
ca neza binni ridagulisaa, naa nga primé binni
de Italia ni gucuaa dxiiña' que. Para iza que,
xpinni Cristu ni lá' George Fredianelli —pri-
mé misioneru ni beeda de Estados Unidos, lu
iza 1946— ma' naca binnigola ni riganna ca neza
binni ridagulisaa. Guyuaa' stale semana ra nuu-
be para gusiidibe naa xi guirá' naquiiñe' guné',
de raqué ma' bizuluá' dxiiña' que stubé'. Nabé
rietenalá'dxe' neza binni ridagulisaa de Faenza,
primé neza binni ridagulisaa yeganna'. Bixuí-
lú si: ¡qué huayuu dxi gudiee' nin ti libana! Neca
zaqué, bine' stipa pur uguaa' gana laacabe para
guzulú gúnicabe jma lu xhiiña' Dios. Lade ca bi-
nni ni cucaadiaga naa que nuu stale hombrehu-
iini' ne dxaapahuini', chupa chonna de laaca'
beeda gápaca' dxiiña' risaca ndaaní' guidxi Italia
despué.

Ra canaganna' ca neza binni ridagulisaa que
ridxaagaluá' guendanagana ne rizaaca' xiixa ni
cadi cabeza', neca zaqué, nabé nayeche' rune'
sentir ora ma' cayune' dxiiña' ca, purti' racaneni
gannaxhiee' guirá' ca biche' ne ca biza'na'.



Nagana gúcani para ca religión biluxe si guendaridinde que

Yanna rapa' gana güeniá' laatu ximodo gúcani para ca religión biluxe si guendaridinde que. Iglesia Católica nga naaze' dxiichi' ne cayuni mandar guirá' ladu, ne nécape' gu'ta' sti ley cubi lu iza 1948, ley sti' ca fascista qué nudiica' lugar nucuechedu diidxa' sin nucueezaca' laadu, ne zacá gúcani dede lu iza 1956. Ne nuu sti cosa, cani naca xaíque yu'du' biraru' ni bí'nica' para nucueezaca' ca guendaridagulisaa de chupa gubidxa stidu. Peru nuu tiru qué ñaca dí' ni racalá-dxicabe, casi ni bizaaca Sulmona iza 1948, ti guidxi nuu galahuí' de Italia.

Bizuluá' guendaridagulisaa que domingu siadó' ne bidii Giuseppe Romano ti libana. Ndaani' teatru ra nuudu que guyé 2,000 binni, guizá' ma' stale ngue para iza nuudu que, purti' nin 500 ni rucheeche diidxa' gastí' guidubi naca Italia. Lade ca binni que nuu chupa sacerdote, ne maca biaanancabe ti hambrehuiini' quiba' ra rudiicabe libana que ora guilúxeni para guzulú guini' huaahua' ne zaqué guireeche ca binni nuu raqué. Oraqueca biseegua' ruaabe né ca diidxa' rí': «Pa rapu' gana guiniu' xiixa la? gudixe teatru iquiiñelu' ne racá guní' guirá' ni gapu' gana». Ora bí'yabe qué nulabi ca binni nuu raqué laabe ne dede bizulú caní'ca' guireebe de raqué la? guyuubibe de ra zuhuaabe que ne nin pa neza guzabe.

Ca iza que nabé nagana guca para naa chiganna' cada neza binni ridagulisaa. Nuu bia-

je guyaa' a pie o lu bicicleta, lu tren o ndaani' autobús yooxho' ne dxatí-paca' de binni. Ne stale biaje gupa xidé guse' ndaani' currá ne ndaani' caadxi yoo yuxe. Biluxe si guendaridinde que, stale de ca binni de Italia nabanineca' bia' zidí-disica' dxi, ne laaca zaqueca nabani chupa chonna Testigu ni nuu raqué. Neca zaqué, nabé sicarú ngue para laadu gúnidu ni na Jiobá.

Guyaa' Scuola sti' Galaad

Lu iza 1950, naa ne Giuseppe Tubini guca invitardu para chuudu clase 16 sti' Scuola sti' Galaad. Nanna' nagana zaca para naa guiziide' inglés. Ne neca rune' stale stipa para guiziide' ni, zulu'asia' cadi para naa dí' ni. Cumu napa xidé guidú'ndadu guidubi naca Biblia lu diidxa' inglés la? biquiiñe' tiempu que para gune' practicar diidxa' que ora ruunda' nadipa', ne stale biaje qué niguee' para bine' ni. Ti dxi guca caber gudíe' ti libana nezalú cani nuaaniá' lu clase. Rietenalá'dxe' ni gudxi tobi de ca maestro que naa ne ruluí' neegue' nga guní-be ni: «Ruuya' rudiilu' libana stilu' né gana ne sicarú modo runiibinalu', peru... ¡nin ti guisi qué liica riene binni inglés rini'lu'». Neca gúcani nagana para naa, peru gunda binduuxe' cursu que ne guca' graduar. De raqué biseendacabe



Dxi bichaganadu ▲

Naa ne xheela' ni nadxiee' ma' zinedu cincuenta y cinco iza de bichaganadu

naa Italia sti biaje né Giuseppe. Né guirá' ni ma' bisiidicabe laadu que, yanna huaxa jma ma' nánnadu ximodo gacanedu ca xpinni Cristu.

Lu iza 1955 bichaganaya' Lidia, gunaa xpinni Cristu ri' guyuunisa gadxe iza ante, ne naa bidiee' libana que. Bixhózebe, Domenico, laaca nabé bininá ca binni ni nuu lu partidu sti' ca fascista laa, ne guleecabe laa de xquidxi chonna iza. Neca zaqué, gunda gucanebe gadxe xiiñibe chuulá'dxica' guiziidica' ni cá lu Biblia. Lidia laaca guca nadxibalú casi bixhoze. Chonna biaje yenécabe laabe nezalú juez ante gudii gobiernu permisú para ganda gucheechecabe diidxa'. Dxi ma' zinedu xhoopa' iza de bichagananu, gule primé xiiñidu, Beniamino, ne lu iza 1972, gule Marco, guiroa xiiñidu. Nabé nayeche' nuua' purti' dede yanna cayúnicabe ni na Dios, laacabe ne binnilídxicabe.

Dede yanna cayuné' ni na Dios

Ridxa' tipa ladxiduá' ora guietenaladxé' guirá' ca iza guzaya' gucaniá' binni gunibiá' Dios. Casi dxi bizulú ca iza sti' 1980, bicaa suegrua' ti carta ra nuu presidente de Italia, Sandro Pertini. Dxi bi'ni' mandar ca fascista, guyuunebe hombre que lu isla sti' Ventotene, raqué nga ruseenda' ca fascista ca binni ni ruuyaca' casi xhenemíguca'. Rapa suegrua' gana gusidí' laabe ni cá lu Stiidxa' Dios, ngue runi gunabá' permisú para güiné laabe diidxa'. Bidiicabe laabe permisú que, ne yeniá' laabe. Nabé galán modo bidxaagalú presidente que laadu —ti cosa ni cadi bia'du— ne



dede gudiiidxi dxiichibe suegrua'. Xadxí gunínedu laabe de cani runi credu ne bidí'du laabe caadxi libru ne revista.

Lu iza 1991, gudí'di' si cuarenta y cuatro iza de canaganna' ca neza binni ridagulisaa ni nuu guidubi guidxi que, bisaana' dxiiña' que. Despué bine' dxiiña' tapa iza casi binnigola ni runi tender ti yoo ra raca guendaridagulisaa ro', peru cumu guca huará'ya' la? gupa xidé bisaana' ni. Peru rudiee' xquíxepé' Dios, purti' cayánderu' cayuné' xhiiñabe. Rucheeche' diidxa' bia' gándatí' ne rusiide' stale binni ni cá lu Biblia. ¡Nuuru' xpinni Cristu ni riní' nabé riguu ca libana stinne' gana laaca! Rudiee' xquíxepé' Jiohá, purti' neca ma' huaniise', náparua' stale gana cáscica dxiqué.

Nabé bidxibe' guendaguti dxi nahuiine'. Peru cumu ma' biziide' chaahue' ni cá lu Biblia la? ma' rune' cré zadxiña dxi guibane' sin qué chu' dxi gate' casi maca guní' Jesús (Juan 10:10). Cabeza' lele' guicaa' ca ndaaya' ni chigudii Jiohá laanu ne guibane' ndaaní' ti guidxilayú ra qué ziuu guiruti' tu guchiiña' laanu. Guisaca Dios ni bizá' laanu, ne ridxa' tipa ladxido'no nga gácanu Testigu stibe (Sal. 83:18).

XII NGA GUENDARIZIILA'DXI' STI' DIOS

«Nanna nu chi udii ru Dios ca xpinni ra iziila'dxi chaahui ca'» (HEB. 4:9)

LU PRIMÉ capítulo sti' Génesis cusiene biqui-ñe' Jiobá xhoopa' «gubidxa» para bi'ni' chaahui' Guidxilayú ti ganda guibani binni luni. Peru cadí ti dxi de 24 hora cani, sínuque gúcacani dxi de stale iza. Despué de bieete' xi guca cada dxi ca la? ruzeete' Biblia ca diidxa' rí: «Beeda chuu huadxí ne beeda chuu siadó'» (Gén. 1:5, 8, 13, 19, 23, 31). Peru gadxé ni rini' Biblia de ni guca ra bizulú gadxe gubidxa que. Xi rini'ni de dxi ca ya'. Biblia na: «Ora biuu Dios lu gadxe gubidxa que guluube ndaaya' ni ne bisisácabe ni, purtí' dxi ca nga *caziilá'dxi'* Dios de guirá' ni gudixhe ique guni'» (Gén. 2:3).

² Moisés bicaa ca diidxa' rí' lu iza 1513 ante de ca dxi sti' Jesús. Yanna, xi zanda guiénenu ora rini' Biblia «bizulú *caziilá'dxi'* Dios» ya'. Racanécani laanu guiénenu nuuru' Jiobá lu gadxe gubidxa ra *caziilá'dxi'*. Peru ñee dede yanna nga *caziilá'dxi'* Dios la? Ñee zanda chu'nu lu dxi *caziilá'dxi'* ca la? Nabé risaca ca guendarinabadiidxa' rí' para cada tobi de laanu.

Ñee *caziilá'dxiru'* Jiobá yanna la?

³ Nuu chupa razón ni racané laanu gánnanu zeru' gadxe gubidxa que tiempu bibani Jesús ne ca discípulo sti'. Primé razón ca ridxélanu ni lu ca diidxa' gudxi Jesús ca binni ni cani' qué runi respetarbe sábadu, dxi nexhe' *guiziilá'dxi'* binni. Laacabe guni' íquecabe cadí jneza ngue runi Jesús milagru dxi sábadu, purtí' ley ni gucuaa Moisés que na cadí naquiiñe' gaca dxiiña' dxi que. Peru guidú'yanu xi bicabi Jesús laacabe: «Dede yanna cayuni Bixhoze dxiiña' ne naa laca cayune'» (Juan 5:16, 17). Yanna, xii nga racalá-

1, 2. Xi rizí'dinu ora ridu'nda' chaahuinu Génesis 2:3, ne xi zándaca guinabadiidxanu laca laanu.

3. Ximodo racané Juan 5:16, 17 laanu gánnanu zeru' gadxe gubidxa que dxi bibani Jesús ne ca discípulo sti'.

dxi' Jesús guiene ca binni que ora guni': «Dede yanna cayuni Bixhoze dxiiña'» ya'. Zeeda gácani casi ora ñabi Jesús laacabe: «Naa ne Bixhoze' cayúnidu ti dxiiña' si. Bixhoze' cayúniru' dxiiña' sábadu sti', ni ma' bindaa mil de iza, nga runi cadí cucheedí' nga gune' dxiiña' dxi sábadu». Né ca diidxa' ca bisiene Jesús zeru' gadxe gubidxa que, dxi *caziilá'dxi'* Jiobá, para ganda guni' ni ma' gudixhe ique para binni ne para Guidxilayú.*

⁴ Guiropa razón ca ridxélanu ni lu ca diidxa' ni gudxi Jiobá Pablu guiní'. Ora cani' apóstol que de guendariziila'dxi' sti' Dios ne ante guzeetebe de Génesis 2:2, bicaabe ca diidxa' rí: «Laanu ma ucuaa nu stiidxa Dios, nga runi *ziu' nu ra chi udii laanu para iziila'dxi nu*» (Heb. 4:3, 4, 6, 9). Ca diidxa' ca rusihuñnicani ca'ru' guiluxe gadxe gubidxa que tiempu nuucabe que. Yanna, padxí nga guiluxe dxi *caziilá'dxi'* Dios ca ya'.

⁵ Para gánnanu padxí guiluxe gadxe gubidxa ca la? naquiiñe' gánnanu xi pur gudixhe Dios ni. Génesis 2:3 cayabi laanu xi pur gudíxhebe ni, racá na: «Ora biuu Dios lu gadxe gubidxa que guluube ndaaya' ni ne *bisisácabe ni*», nga nga razón ca. Jiobá bisisaca dxi ca purtí' guleebe ni para ti dxiiña' nabé risaca: gúnibe ni maca gudixhe íquebe para Guidxilayú rí. Xii nga ni gudixhe íquebe ya'. Guidxá Guidxilayú rí' de bi-

* Jesús bisiene cadí cuchee dí' cani ruzaaqui' gu'xhu' ne ca levita ora rúnica' dxiiña' ndaani' yu'du' que dxi sábadu. Nga runi, pa Jesús nga Xaique sti' cani ruzaaqui' gu'xhu' ndaani' yu'du' sti' Dios la? laaca qué nucheenedibe ley sti' sábadu ora bi'ñibe dxiiña' bidii Dios laabe gúnibe dxi que (Mat. 12:5, 6).

4. Xi razón rudii Pablu ni rusihuinni zeru' gadxe gubidxa que lu primé siglu.

5. Xi gudixhe Dios guni' ora biuu «lu gadxe gubidxa que», ne padxí guiluxe guirá' ni nexhe' gaca dxi ca.

nni *ni ruzuuba' diidxa'* ni gapa ni ne gapa guirá' clase mani' chu' luni (Gén. 1:28). Pur nga «dede yanna cayuni [Jiobá ne Jesús] dxiiña», ne Jesucristu nga na Biblia «Hombre [ni riní'] xii nga jneza guni [binni] dxi enda riziila'dxi'» (Mat. 12:8). Nga runi, dxi caziila'dxi' Dios ca zalúxeni dede ora ma' gaca ni maca gudixhe ique Dios para Guidxilayú rí'. Padxi gaca nga ya'. Ora guiluxe ti mil iza chiguni mandar Cristu.

Cadi gácanu casi caní «qué nuzuuba stiidxa Dios»

⁶ Jiobá bisiene chaahuí' Adán ne Eva xii ngue naguixhe íquebe gúnibe, peru laacabe qué niná-cabe ñacanécabe laabe. Ne bia' dxi huabani binni lu Guidxilayú rí', millón de laaca' huayúnica' cásica b'ni' Adán ne Eva. Dede né guidxi Israel b'ni' zacá, neca gúcaca' ti guidxi ni gulí Dios. Despué gudixhená Pablu ca primé xpinni Cristu, purti' zándaca gueeda guchee chupa chonna de laaca'. Sicarí' bicaabe ra nuuca': «[Gúninu sti-pa] para ganda chu' nu ra chi iziila'dxi nu, ne cadi [gácanu casi] ca binni ni qué nuzuuba stiidxa Dios que» (Heb. 4:11). Lu ca diidxa' ca bisi-huinni apóstol rí' qué riuu dí' binni lu guendariziila'dxi' sti' Dios ora qué ruzuuba' diidxa'. Peru laaca caguixhenácani laanu. Xi zazaacanu pa qué gacanenu Dios para gaca ni maca gudixhe ique ya'. Ñee qué ziu'nu lu guendariziila'dxi' sti' Jiobá pa qué gacanenu laa la? Naquiiñepe' nga guini' ique chaahuinu caní gunabadiidxanu ca. Ne zacané tema rí' laanu para guini' íquenu de laani. Peru primeru guidú'yanu xii nga ni cadi jneza b'ni' ca israelita ne xiñee qué ñuucabe lu guendariziila'dxi' sti' Dios.

«Qué ziuu dxi chu' cabe ra nudiee laacabe para niziila'dxi cabe»

⁷ Lu iza 1513 ante de ca dxi sti' Jesús, gudxi Jiobá Moisés xi racalá'dxi' guni né ca israelita ni naca esclavu Egipto: «Yanna ma' chiguiete' para gula'ya' laacabe de lu ná' ca egipcio ne para cuee' laacabe de ra nuucabe ca ne cuaa' laacabe lu ti

6. Xi ejemplu cadi naquiiñe' chinándanu, ne ximodo caguixhenácani laanu.

7. Xi para gulee Jiobá ca israelita de Egipto, ne xi gúdxibe laaca' naquiiñe' gúnica'.

layú sicarú ne xilaga, ti layú ra ridá leche ne dxi-ña yaga» (Éxo. 3:8). Xi para bilá Jiobá laacabe ya'. Para guni laacabe xquidxi, casi modo gúdxibe ni Abrahán (Gén. 22:17). Ne laaca bidii Dios laacabe caadxi ley ni zacané laacabe chú'cabe tobi si né laa ne gaca xhamígucabe laa (Isa. 48:17, 18). Peru laaca gúdxibe laaca' ca diidxa' rí': «*Pa gúnitú guirá' ni gabe' laatu ne dxandipe' gúnitú ni na pactu [de ley] stinne' la?* dxandipe' zeeda gácatu guidxi stinne' ni nabé risaca de lade guirá' ca guidxi ni nuu, purti' guidubi naca guidxilayú rí' stinne' laa» (Éxo. 19:5, 6). Casi ma' bidú'yanu ca, ñanda ñaca ca israelita xquidxi Dios pa qué nu-saana de nuzuubaca' stiidxabe.

⁸ ¡Nabé galán ndaaya' nga ni gudxi Jiobá laacabe guicaacabe! Bia' dxi guzuubacabe stiidxabe, zaguube ndaaya' layú stica', ca layú uva stica', ca dendxu' stica' ne ca yuze stica'. Ne nin ti xhenemígucabe qué ziuu dxi guniná laacabe. Biblia na: «Salomón nga rey ni jma gupa bidxichi ne guendabiaaní' lade guirá' ca rey ni guyuu lu guidubi naca guidxilayú. Ne beeda guirá' binni nuu lu guidxilayú ra nuu Salomón para gú'yaca' laabe ne gucaadiágaca' guirá' guendabiaaní' guluu Dios ndaaní' ladxido'be» (**1 Reyes 10:23, 24**). Nin ti guidxi ro' ni runi mandar guidubi Guidxilayú qué zanda guquiiichiná' laacabe. Ne ora ñe-dandá Mesías que, ñándaca ñacarúcabe ti guidxi ni qué runi mandar stobi laa, lugar de ñuni mandar Roma laacabe, casi gúcani que. Jiobá gupa gana ñácacabe ti ejemplu para xcaadxi guidxi ne nusihufñnicabe riguu Dios ndaaya' binni ni ruzuuba' stiidxabe.

⁹ Ñanda niquiiñe' Jiobá ca israelita que para ñacaneca' laabe ñúnibe ni maca gudixhe íquebe. Nicaacabe ndaaya' sti' Jiobá ne laaca ñacanécabe ñuu ndaaya' guirá' binni guidxilayú (Gén. 22:18). Triste guininu ni, peru stale de ca israelita qué ñuulá'dxica' ñácaca' ti guidxi ni ñuni mandar Dios laaca' ne ñácaca' ti ejemplu para xcaadxi guidxi. ¡Laga gucuá' íqueca' guibiguétaca' Egipto! (Núm. 14:2-4.) Peru xi nibeendúcabe pa

8. Xi gudxi Jiobá ca israelita zacaaca' pa guzuubaca' stiidxabe.

9, 10. 1) Xiñee bichee ca israelita ora gucalá'dxica' nibiguétaca' Egipto. 2) Xi nizaaca né modo runi adorárcabe Dios pa nibiguétacabe raqué.



Xiru' caquiiñe' gúninu para chu'nu lu guendariziila'dxi' sti' Dios

nibiguétacabe Egipto ya'. Ñee niqiiñeru' Jobá laacabe para ñacanécabe laa ñaca ni maca gudixhe ique la? Nin gaxha. Ñacacabe esclavu sti biaje ra nuu ca binni ni qué runi adorar Jobá ne qué ñanda ñunicabe ni na Ley gucuua Moisés ne qué nutiidila'dxi' Dios stóndacabe. Cumu gucuá íquecabe guibiguétacabe Egipto la? bisihuínnicabe da'gu' xpiaanicabe ne ruyúbicabe puru si para laacabe. Nga runi, sicari' bizeete' Jobá de laacabe despué: «Bidxiiche nia laacabe ne gudxe óraque: “Nisi canauchee ca binni ri'. Qué riná ca guni ca ni rabe’”. Nga runi bidxiiche nia laacabe ne bine ti juramentu, qué ziuu dxi chu' cabe ra nudiee laacabe para niziila'dxi cabe» (Heb. 3: 10, 11; Sal. 95:10, 11).

¹⁰ Né ni gucuá íquecabe gúnicabe que, bisihuínnicabe qué ruisácacabe ca ndaaya' cudii Dios laacabe. Ni jma gucuá íquecabe nga ca guitu, ca xandié, ca cebolla ne guirá' guendaró galán nuu Egipto (Núm. 11:5). Qué liica nisisácacabe ni cayuni Jobá pur laacabe, sínuque bí'nicabe casi bí'ni' Esau, purti' laa qué liica ñaxha ique ora bitoo herencia bidii Dios laa pur ti bladú' lenteja (Gén. 25:30-32; Heb. 12:16).

¹¹ «Dede yanna cayuni [Jobá] dxiiña» para gaca ni maca gudixhe ique. Ngue runi, neca qué ñapa ca israelita ni biree de Egipto que fe la? qué nucueza dí' ni laabe de gúnibe ni maca gudixhe íquebe. Para ganda gúnibe ni, biquiiñebe ca israelita ni gule despué, purti' laaca' jma bizuubaca' diidxa' que bixhózeca'. Ora gudxi Jobá laacabe chú'cabe lu Layú ni Bizabiruaa Dios ne

11. Xi bí'ni' Jobá neca qué ñapa ca israelita ni bibani dxi sti' Moisés fe.

chaahui' chaahui' cueecabe ca enemigu stí'cabe la? bizuubacabe stiidxabe. Josué 24:31 caní' modo bí'nicabe: «Bí'niru' Israel ni na Jobá bia dxi bibani Josué ne guirá' dxi bibani ca binnigola despué de guti Josué, cani bí'ya' guirá' cosa nandxó' bí'ni' Jobá pur Israel».

¹² Peru bidxiña dxi guti ca israelita ni ruzuuba' diidxa' que ne despué gule xcaadxi «ni qué ñunibiá' Jobá ne qué ñánnaca' guirá' ni bí'nibe pur guidxi Israel». Xi bí'ni' ca israelita ri' ya'. «Bizulú bí'nicabe puru si guendaquéiquiiñe' nezalú Jobá, ne bí'ni' adorárcabe ca Baal que.» (Jue. 2:10, 11.) Cumu qué nuzuuba' ca binni ri' diidxa' la? ma' qué ñuuneca' Dios tobi si ne qué ñúnica' Layú ni Bizabiruaa Dios que casi ti lugar «ra na Dios iziila'dxi ca'». Sicari' bisiene Pablu de laacabe: «Purti [pa niguu] Josué [laaca'] ndaani guidxi ra na Dios iziila'dxi ca' [...] la? qué nuzee ru Dios [de] sti dxi. Nga runi nanna nu chi udii ru Dios ca xpinni ra iziila'dxi chaahui ca'» (Heb. 4:8, 9). Tuu nga cuzeete' Pablu ora guní' «ca xpinni' Dios ya'. Guirá' ca xpinni Cristu, cásica judíu zaqueca ni cadí judíu. Yanna, ñee riní' nga zanda chu' guirá' ca xpinni Cristu nabani yanna lu guendariziila'dxi' sti' Dios la? Zanda pue.

Caadxi xpinni Cristu ni qué ñuu lu guendariziila'dxi' sti' Dios

¹³ Lu carta ni bicaa Pablu ra nuu ca hebreu

12. Ximodo nánnanu zándaru' chu' binni lu guendariziila'dxi' sti' Dios.

13, 14. Xi naquiiñe' guni binni para chu' lu guendariziila'dxi' sti' Dios 1) tiempu bibani Moisés 2) ne lu primé siglu que.



Para ganda chu'nu lu guendariziila'dxi' sti' Jobá, naquiiñe' guzú'banu stiidxabe ne gacanenu gaca ni maca gudixhe íquebe casi modo zigusiene xquídxibe laanu

que, bisihu'nnibe nuube xizaa purti' nuu xpinni Cristu cadi cayacané para gaca ni maca gudixhe ique Dios, sínuque cayúnica' gadxé cosa (**biinda' Hebreos 4:1**). Yanna, xi cayúnicabe ya'. Laacabe cayunirúcabe ni na Ley ni gucuaa Moisés. Dxandí' biquiiñe' Ley que ti mil gaayu' gayuaa iza, ne guirá' caní racala'dxi' gacané para gaca ni maca gudixhe ique Jobá la? naquiiñe' gúnica' ni na Ley que. Peru guti si Jesús ma' qué niquiiñe' dí' Ley que, ne rulu' si qué ñene caadxi xpinni Cristu ni. Ngue runi nabé gucua' íqueca' gúnica' ni na Ley que.*

¹⁴ Xi bisiene apóstol Pablu ca xpinni Cristu ni nabé riuula'dxi' chinanda Ley ni gucuaa Moisés que ya'. Gúdxibe laaca' ma' nuu xhonna cosa ni jma risaca, laacani nga ti yu'du' sti' Dios, ti pactu nacubi ne ti xaíque sti' caní ruzaaqui' gu'xhu', Jesús. Ne jma risácacani que yu'du' ni gupa Israel, que pactu ne xaíque sti' caní ruzaaqui' gu'xhu' ni gúpacabe (Heb. 7:26-28; 8:7-10; 9:11, 12). Ne ora bizeete' Pablu de ley sti' sábadu ni zeeda lu Ley ni gucuaa Moisés que, biquiiñebe ni para gusiénebe ca xpinni Cristu zanda chu'ca' lu guendariziila'dxi' sti' Jobá. Laabe guni'be sicarí': «Nga runi nanna nu chi udii ru Dios ca xpinni ra iziila'dxi chaahui ca'. Ne irá ni chu' raqué zaziila'dxi de xhiña', casi biziila'dxi Dios dxi binduuxe xhiña» (Heb. 4:8-10). Ca xpinni Cristu que naquiiñe' ñánnaca' ma' qué zanda dí' chuula'dxi'

* Qué gánnadinu pa despué de Pentecostés ni guca lu iza 33 que, guyuu tuuxa xpinni Cristu ni naca judfu ni biiti maní Dxi Rixá Stonda Binni. Pa guyuu tu b'ni' ni la? bisihu'nnibe qué runi respetarbe guendaguti sti' Jesús. Neca zacá, nánnanu guyuu caadxi binni ni gucua' tema chinándape' caadxi de ca Ley que (Gál. 4:9-11).

Jobá modo runi adorarca' laabe pa gúniruca' guirá' ni na Ley ni gucuaa Moisés. Yanna, xi naquiiñe' guni binni para chuula'dxi' Dios modo runi adorar ya'. Naquiiñe' gapa fe Jesucristu, ne bizulú gúcani zacá dede dxi guca Pentecostés lu iza 33 que.

¹⁵ Xiñee qué ñuu ca israelita ni bibani tiempu sti' Moisés lu Layú ni Bizabiruaa Dios que ya'. Purti' qué nuzuubacabe diidxa'. Ne xiñee qué ñuu caadxi de ca xpinni Cristu ni bibani tiempu sti' Pablu lu guendariziila'dxi' sti' Dios ya'. Laaca pur qué nuzuubacabe diidxa'. Qué nuzuubacabe stiidxa' Jobá. Qué ñuni crécabé pa ma' racala'dxi' Jobá guni adorar xquidxi laa gadxé modo ne gusaana de gúnicabe ni cá lu Ley sti' Moisés.

15. Xi ejemplu zeeda lu Biblia ni rusihuinni qué zanda dí' chu' ca binni ni qué ruzuuba' diidxa' lu guendariziila'dxi' sti' Dios.

Para guiní' íquenu

- Xiñee gudixhe Jobá ti dxi para guizii-la'dxi'.
- Ximodo nánnanu nuurunu lu gadxe gubidxa sti' Dios ne ca'ru' guilúxeni.
- Xiñee qué ñuu ca israelita ni bibani tiempu sti' Moisés lu guendariziila'dxi' sti' Dios ne xiñee qué ñuu caadxi de ca xpinni Cristu ni bibani lu primé siglu luni.
- Xi naquiiñe' gúninu para chu'nu lu guendariziila'dxi' sti' Dios.

Ximodo zanda chu'nu lu guendariziila'dxi' sti' Dios yanna

¹⁶ Ca dxi stinu ri', nin tobi de laanu qué zadi'di' ndaaní' ique naquiiñe' chinanda ni na Ley ni gucuaa Moisés para ganda guilá. Nabé nayaguie' modo bisiene Pablu ni lu carta ni bicaa ra nuu ca binni de Éfeso ora guní': «Pur enda nacha'hui stibe bilá be laatu, ne bíni be ni purti bini cre tu, ne cadí pur xiixa ni bíni tu, sínuque de laabe zeeda ni. Iruti qué zalá pur ni guni, ti qué chu' tu udxiiiba laca laa» (Efe. 2:8, 9). Yanna, xi naquiiñe' gúninu pa racalá'dxinu chu'nu lu guendariziila'dxi' sti' Dios ya'. Guietenalá'dxinu chiguni Jobá xiixa nabé risaca dxi guleebe para guiziilá'dxibe que. Xi chigúnibe ya'. Chigúnibe ni maca

16, 17. 1) Ximodo zanda chu'nu lu guendariziila'dxi' sti' Dios. 2) Xi zadú'yanu lu sti tema ca.

gudixhe íquebe para Guidxilayú ne para binni. *Nga runi, para ganda chu'nu lu guendariziila'dxi' sti' Jobá la? naquiiñe' guzú'banu stiidxabe ne chinándanu ni cayabi xquídxibe laanu para gaca ni maca gudixhe íquebe.*

¹⁷ Qué chu' dxi guini' íquenu qué risaca ca conseju ni zeeda lu Biblia ni rudii mozo ni nuu xpiaani' laanu ne cadí chinándanu modo riní' íquesinu. Pa gúninu zacá la? zusihuínninu qué racalá'dxinu gacanenu gaca ni ma' gudixhe ique Jobá ne zusaana de gaca xhamígunu laabe. Yanna, xii nga ca guendanagana ni zándaca gucueza laanu de guzú'banu diidxa' ya'. Lu sti tema ca zadú'yanu caadxi de laacani ne laaca zadú'yanu ximodo rusihuinni cani riguixhe íquenu gúninu pa ma' biu'nu lu guendariziila'dxi' sti' Dios.

ÑEE MA' BIUULU' LU GUENDARIZIILA'DXI' STI' DIOS LA?

«*Stiidxa Dios la? rudii enda nabani laanu, ne nandxó' ni.*» (HEB. 4:12)

LU TEMA gudídinu ca bizí'dinu naquiiñe' guzú'banu stiidxa' Dios ne gacanenu gaca ni maca gudixhe íquebe ti ganda chu'nu lu guendariziila'dxi' stibe. Peru nuu biaje rácani nagana para laanu. Casi pa ñánnanu qué riuulá'dxi' Jobá xiixa ni riuulá'dxinu gúninu, ñee niní' íquenu qué zanda gucha'nu la? Pa guini' íquenu zacá la? zácanu ti binni ni qué riná guzuuba' diidxa' (Hech. 5:29). Lu tema ri' zadú'yanu ximodo zanda gusihuínninu pa dxandí'

1. Xi naquiiñe' gúninu para chu'nu lu guendariziila'dxi' sti' Dios, ne xiñee nuu tiru rácani nagana para laanu.

riuulá'dxinu guzú'banu diidxa' guirá' ora lu caadxi cosa.

² Nuu tiru raca nagana para laanu chinándanu ca conseju ni zeeda lu Biblia, cadí dxandí' la? Biblia na racalá'dxi' Dios gutagulisaa «ca cosa ni jma risaca sti' ca guidxi ca», nga nga zeeda gaca ca binni ni ruuyabe dxandí' risaca purti' riuulá'dxica' gúnica' ni jneza (Ageo 2:7). Dxandí', stale de laanu cadí jneza modo rúninu caadxi cosa ante guzulú' guidú'ndanu Biblia. Peru despué nabé beeda gannaxhiinu

2, 3. Xi naquiiñe' gúninu para chuulá'dxi' Jobá modo runi adorarnu laa.

Jiobá ne Xiĩni', nga runi gupa xidé bicha'nu modo laanu ne modo rúninu caadxi cosa. Peru cumu racalá'dxinu chuulá'dxi' Dios modo runi adorarnu laa la? gupa xidé bíninu stipa ne bíni' orarnu stale para gunda bicha'nu. Ne despué biéchenu ora bidxiña dxi guyu'nisanu (*biinda' Colosenses 1:9, 10*).

³ Yanna, ñee racá nga biluxe dxiiña' stinu la? Co', cadi racá dí. Nánnanu naquiiñeru' gúninu stipa para gucha'nu modo laanu ne para gúninu ni riuulá'dxi' Dios, purti' binni ruche laanu. Peru nanna dxíchinu zaguu Jiobá ndaaya' stipa stinu pur gusiéchenu laa guirá' dxi pa qué guire'nu gana.

Guicaanu ca conseju ni rudiicabe laanu

⁴ Ante gucha'nu xiixa lu xquendanabáninu, primeru naquiiñe' gánnanu paraa nga naquiiñe' gucha'nu. Ximodo racané Jiobá laanu para gúninu nga ya'. Zanda iquiiñebe ti libana ni gucaa laanu guini' íquenu o ti tema sti' ti revista ni gacané laanu gudi'nu cuenta cadi jneza modo rini' íquenu o cadi jneza modo cayúninu caadxi cosa. Peru pa qué guiénenu conseju ca o pa qué gúninu ni la? zanda iquiiñebe tobi de ca xpinni Cristu para gusietenalá'dxi' ni laanu (*biinda' Gálatas 6:1*).

⁵ Nuu tiru, neca né diidxa' nadó' gudii ti xpinni Cristu xiixa conseju laanu, zándaca gaca nagana para laanu guicaanu ni, purti' nánnanu laaca binni ruche laabe casi laanu. Neca zacá, naquiiñe' guietenalá'dxinu Jiobá nga *rabi* cani zaniru' lade ca binni ridagulisaa ca diidxa' ri': «Laulidxe [ca xpinni Cristu] ne diidxa' nadó'», o lauguu jneza laacabe né guendarannaxhii (Gál. 6:1). Pa guicaanu ca conseju ni gudiicabe laanu la? zácanu binni «jma risaca» ne zalú Dios. Ora rinínenu Jiobá, rábinu laabe dxandí' ruche'nu. Peru zándaca gaca nagana para laanu guininu dxandí' biche'nu ora gabi ti binnigola ni laanu. Zándaca guzulú gábinu laabe xi pur bíninu xiixa o guininu cadi naxoope' ni bini-

4. Xi riquiiñe' Jiobá para gudii conseju laanu.

5. Xiñee naquiiñe' gacané ca binnigola ca xpinni Cristu, ne xi cadi naquiiñe' gúninu ora gudiicabe conseju laanu.

nu. O zándaca guininu qué riábanu laabe o qué ñácabe nacha'hui' ora guni'nebe laanu (2 Rey. 5:11). Nuu tiru zadxiichinu ora gabi ca binnigola laanu xiixa ni qué riuulá'dxinu gucaadiáganu. Casi ora gábicabe laanu cayuni ti binnilá'dxinu xiixa ni cadi jneza o gábicabe laanu cadi jneza modo rácunu lari. Zándaca gábicabe laanu nabiidi' modo rihuinni xcuérpunu o qué riuulá'dxi' Jiobá caadxi cosa ni rúninu para chu'nu nayeche'. Pa cadxiichinu la? zándaca gueeda guininu xiixa ni cadi jneza. Zaguu nga laanu triste ne laaca ziuu xpinni Cristu ni racalá'dxi' gacané laanu ca triste. Peru ora ma' gudi'di' xiana stinu, ziénenu cadi jneza ni bíninu ne zudi'nu cuenta bia'si ngue conseju ni bidiicabe laanu.

⁶ Lu versículo ni zeeda ra ruzulú tema ri' rusietenalá'dxi' laanu «nandxó' [...] Stiidxa Dios», o nápani poder. Racaneni laanu gucha'nu stale cosa lu xquendanabáninu, ne cadi rúninu cani ante si chu'nisanu, sínuque laaca racaneni laanu guchárunu despué de ma' guyu'nisanu. Lu carta ni bicaa Pablu ra nuu ca xpinni Cristu hebreu, guni' sicari': «Zanda guiaazi [Stiidxa Dios] dede jma guete', dede ndaani dxita. Ora ma yendá stiidxa be que ndaani ladxidó' no la? ribee irá ni nuu ndaani ladxidó' no, ne ni cá lu xquenda biaani nu, para ganna nu ximodo laanu» (Heb. 4:12). Ndi' nga ni racalá'dxi' Pablu guisene né ca diidxa' ca: ora ma' biénenu xi cayabi Dios laanu lu Biblia la? zusihuinninu xipe' nga nuu ndaani' ladxidó'no pur guirá' ni gúninu. Yanna, xi zanda guininu de cada tobi de laanu ya'. Ñee gadxé ni rusihuinninu, peru gadxé nga ni nuu ndaani' ladxidó'no la? (*Biinda' Mateo 23:27, 28*.) Guini' íquenu xi ñúninu lu cani chiguzé'tenu ri'.

Chuunu bia' ze' xquidxi Jiobá

⁷ Stale de laanu runibiá' chaahuinu xiná

6. Ximodo rusihuinni Stiidxa' Dios xi nuu «ndaani ladxidó' no [...] ne ni cá lu xquenda biaani nu».

7, 8. 1) Xiñee gucuá caadxi xpinni Cristu judfú tema gúnica' ni cá lu Ley sti' Moisés. 2) Xiñee rininu cadi cayacanécabe para gaca ni maca gudixhe ique Jiobá.

Proverbios 4:18: «Neza sti' cani nacha'hui' zeeda gaca casi biaaní' ridxi' ni ze' ora jma ziyaca naya'ni' dede guiaaní' dxindxi». Ca diidxa' ca rusihuínnicani jma jneza modo ziénenu ni cayabi Jiohá laanu ne jma jneza modo zuni adorarnu laabe ra ma' zidi'di' dxi.

⁸ Lu tema gudídinu que bidú'yanu qué niná stale discípulo ni naca judífu nusaana ca Ley sti' Moisés despué de guti Jesús (Hech. 21:20). Lu ca carta ni bicaa Pablu, nayaguie' modo bisiene ma' cadí naquiiñe' chinanda ca xpinni Cristu Ley que, peru gyyuu tu qué niná ñuni ni gúdxibe laaca' (Col. 2:13-15, NM). Xiñee ya'. Purtí' zándaca guní' íquecabe ma' qué zaladxi ca judífu laacabe pa gúnicabe neca chupa chonna de cani zeeda lu Ley que. Lu carta ni bicaa apóstol que ra nuu ca xpinni Cristu hebreu bisiene qué zanda chú'cabe lu guendariziilá'dxi' sti' Dios pa qué gacanécabe para gaca ni maca nagueixe ique Dios (Heb. 4:1, 2, 6; *biinda' Hebreos 4:11*).^{*} Pa racalá'dxicabe chuulá'dxi' Dios ni rúnicabe la? naquiiñe' guíenecabe ma' gudixhe Jiohá sti modo guni adorar binni laa.

⁹ Ca dxi nabáninu rí, ma' huadú'yanu ximodo jma jneza zigusiene mozo ni nuu xpiaaní' caadxi cosa ni zeeda lu Biblia. Lugar de chu'nu xizaá pur ni cayuni mozo rí, racanécani laanu para guni crenu laabe de guidubi ladxid'no. Grupu ni Zaniru' nga ni rini' pur mozo ni nuu xpiaaní', ne ora caquiiñe' gu'ya' pa jneza nuu xiixa o pa caquiiñe' guchaa xiixa la? rúnibe ni tiempu stini. Ne qué ridxíbicabe xi guini' binni. Ni jma risaca para mozo ni nuu xpiaaní' nga gacané para gaca ni maca gudixhe ique Dios. Yanna lii ya'. Xi ru'nu' ora ruchaa mozo ca modo riénenu xiixa ni zeeda lu Biblia ya'. Qué racalá'dxinu gácanu casi ca fariseu, laaca' jma gyyuulá'dxica' gueca' vinu yooxho', o guiaananeca' guirá' ni maca biziidica', lugar de

^{*} Nécape' gyyuu stale de ca xaíque sti' ca judífu ni yenda módope' cá lu Ley sti' Moisés, qué nudicabe cuenta pa Jesús nga Mesías ni nexhe' gueeda. Ni bizaaca nga qué ñenecabe ximodo cayuni Jiohá ni maca gudixhe ique.

9. Xi naquiiñe' gúninu ora guchaa mozo ni nuu xpiaaní' modo riénenu xiixa ni zeeda lu Biblia.

gánnaca' ca cosa nacubi cusiidi' Jesús, cani zeeda gaca casi vinu cubi (*biinda' Lucas 5:39*).

¹⁰ Guzé'tenu sti ejemplu. Ra ziluxe siglu XIX ne ra bizulú siglu XX, gyyuu caadxi de ca Binni ni Ruunda' Biblia —zacá binibiá'cabe ca testigu sti' Jiohá dxiqué— nabé galán modo rudiica' libana. Laacabe guní' íquecabe modo jma jneza gucheechecabe diidxa' nga gudiicabe libana galán. Riuulá'dxicabe guini'cabe nezalú stale binni, ne nuu de laacabe riéchechecabe ora gusisaca binni laacabe pur modo rudiicabe libana. Peru despué biene xquidxi Dios laaca cabeza Jiohá gucheechecabe diidxa' de yoo pur yoo ne cadí gudiisícabe libana nezalú stale binni. Stale de cani nabé galán modo rudii libana qué liica ninaca' ñúnica' ni. Lu ca libana ni bidiicabe bicaacabe binni guni cré dxandí' nadxiicabe Jiohá ne ruzuubacabe stiidxa', peru ni b'nicabe ora guní' xquidxi Dios naquiiñe' gucheechecabe diidxa' bisihuínnini cadí dxandí' ni bicaacabe binni guni cré. Nánnanu qué ñuulá'dxi' Jiohá ni b'nicabe que ne despué bisaanacabe xquidxi Dios (Mat. 10:1-6; Hech. 5:42; 20:20).

¹¹ Laaca guca nagana para xcaadxi de ca Binni ni Ruunda' Biblia que gucheecheca' diidxa' de yoo pur yoo dxi guní' xquidxi Dios gácani. Peru bizuubacabe diidxa' ne qué nusaanacabe xquidxi Jiohá. Chaahui' chaahui' ma' qué nidxíbicabe nucheechecabe diidxa' ne nabé guluu Jiohá ndaaya' laacabe. Yanna lii ya'. Xi ru'nu' ora gábicabe lii chigucheechelu' diidxa' sti modo ni cadí bialu' ya'. Ñee ru'nu' ni la?

Ora gusaana ti binnilídxinu Jiohá

¹² Nánnanu naquiiñe' gácanu nayá lu guirá' cosa para chuula'dxi' Jiohá modo runi adorar-nu laa (*biinda' Tito 2:14*). Peru ziuu ora zaca nagana para laanu chinándanu conseju ca. Quíxhenu ejemplu sti' ti guendaxheelá' ni runi ni na Dios, laaca' cayuyaca' modo cusaana tobi

10, 11. Xi rizi'dinu de ni bizaaca ora bichaa xquidxi Dios modo guireeche diidxa'.

12, 13. 1) Xiñee rinaba' Jiohá guiree caní runi cosa malu de ndaani' xquidxi pa qué naca' gaca arreptirca'. 2) Xi guendanagana zanda guidxaagalú caadxi de ca xpinni Cristu ni napa xiíñi'.

*Naro'ba' ne naná yuuba' riaana
ndaani' ladxidó' cani napa xiiñi'*

lucha xiiñica' xquidxi Jiohá. Xiiñicabe ca jma riuula'dxi' guni cosa malu «chupa chonna gubidxa» que chu' galán né Dios ne bixhoze ne jñaá. Cumu ma' cadi jneza canazabe la? guleecabe laabe de ndaani' xquidxi Dios (Heb. 11:25).

¹³ Nabé triste biaana jñaabe ne bixhózebe. Laacabe nánnacabe rudii Biblia conseju ri': «Cadi idxaaga tu *nin tobi* de cani na hermanu laa ne napa jnadxii o ni puru si rucaa ique gapa bidxichi, o ni runi cre bidó' o ni riguu dí o ni rixudxi o ni riba'na'. Ni runi zacá la? nin cadi lica go né tu laa gueta» (1 Cor.

5:11, 13). Riénecebe ora ruzeete' Biblia diidxa' «nin tobi» laaca caní' ni de ca binnilídxicabe ni cadi nabezané laacabe ndaani' tobi si yoo. Peru cumu nabé nadxiicabe xiiñicabe la? zándaca guiní' íquecabe sicarí': «Naquiiñe' guinínedu xiiñidu bia' gándati'. Qué zanda dí' gacanedu laabe guibiguétabe ndaani' xquidxi Jiohá pa qué guinínedu laabe».*

¹⁴ Riénecebe pabiá' naná yuuba' nuu ladxidó' guendaxheela' ca. Cadi cadí'dicabe lu guendanagana ca purti' racalá'dxicabe. Guyuu tiempu ñanda ñuni chaahui' xiiñicabe modo canazá. Peru jma gucuá íquebe gúnibe ni cadi jneza que chú'nebe bixhózebe ne ca binni ridagulisaa galán. Nécape' racalá'dxi' bixhózebe ne jñaabe gacaneca' laabe, qué zanda dí' guacaacá laabe gúnibe ni racalá'dxica'. Nga runi, riénecebe xiiñee naná modo nuucabe.

¹⁵ Peru laacabe laaca naquiiñe' quixhe íquecabe gúnicabe ti cosa: ñee zuzuubacabe stiidxa' Jiohá la? Dxandí', ziuu biaje zadagulisaa nécabe xiiñicabe para guiní'cabe ne gú'yacabe ximodo gaca xiixa ni risaca ndaani' lídxicabe. Peru ñee

* Zadxe'lu' jma ni caní' de laani lu libru *Cadi guixéle-nu de Dios ni nadxii laanu*, yaza 207 dede 209.

14, 15. Xi guendanagana ridxaagalú cani napa ti xiiñi' ni ma' biree ndaani' xquidxi Dios.



rusihuinni ca diidxa' ca zanda guidxaagacabe laabe ora tiisi neca cadi caquiiñe' gúnicabe ni la? Ora quixhe íquecabe gúnicabe xiixa, cadi naquiiñe' guiaanda' laacabe xi riní' ique Jiohá. Laabe maca gudíxhebe xi pur naquiiñe' guiree tuuxa ni qué na' gaca arrepentir ndaani' xquidxi: para chu' guidxi stibe nayá ne pa ganda la? gucaani binni ni bichee ca guibigueta' ndaani' xquidxi Dios. Ximodo zanda gacané cani napa xiiñi' gaca ni racalá'dxi' Jiohá ya'.

¹⁶ Aarón, bí'chi' Moisés, laaca bidxaagalú ti guendanagana casi bizé'tenu ca né chupa de ca xiiñi', Nadab ne Abihú. Jiohá bii-ti laacabe purti' cadi jneza ni bí'nicabe ora bizaquicabe gu'xhu'. Guní' ique pabiá' naná ni bí'ni' sentir Aarón pur ni bizaaca ri', ma' qué ziuuru'dxi gú'yabe ca xiiñibe, nin guiní'nebe laaca' ne qué zanda chú'nebe laaca'. Peru cadi ngasi. Aarón ne xcaadxi xiiñi' gudxi Dios laaca' cadi gusi-hufnnica' nuuca' triste né ca diidxa' ri': «Cadi gudiitu lugar guihuinni guicha íquetu nayuxe, ne cadi guichézatu xhábatu, para cadi gátitu ne para cadi guidxiichiné [Dios] guirá' ca binni ridagulisaa» (Lev. 10: 1-6). Nabé nayaguie' nuu conseju ca para laanu: naquiiñe' gannaxhiinu Jiohá jma que bia'

16, 17. Xi rusiidí' ejemplu sti' Aarón laanu.

nadxiinu ti binnilídxinu, jmaru' si pa qué ná gaca arrepentir.

¹⁷ Ca dxi ri', cadi nagueendaca ruuti Jobá cani rucheen' ca ley sti'. Nabé nadxiibe laaca', nga runi rudiibe lugar gusihuínica' ma' guca arrepentirca'. Peru pa cueecabe xiiñi' ti testigu de ndaani' xquidxi Dios la? rusihuinni nga qué ninádibe nuchaabe modo canazabe. Yanna, xi zazaaca pa guidxaagacabe xiiñicabe ni ma' biree de ndaani' xquidxi Dios ya'. Ñee qué zuuya' Jobá ni casi ora qué nácabe guzubbacabe stiidxa' la?

¹⁸ Stale xpinni Cristu ma' bibiguétaca' ndaani' xquidxi Dios yanna pur ni bi'ni' ca binnilídxica' ne ca xhamíguca'. Xi bi'ni' ca binni ri' ya'. Qué niní'neca' laacabe tiempu bireecabe lade ca binni ridagulisaa, purti' ruzuubaca' stiidxa' Jobá. Guzé'tenu ni bizaaca ti ba'dudxaapa'. Laabe gúdxibe ca binnigola bichaabe modo nabánibe pur ni bi'ni' bizá'nabe. Bizá'nabe qué nusaana Jobá ne bi'ni' ni na ca mandatu sti' Dios bia' tiempu bireebe de ndaani' xquidxi Dios. Nga nga ni bicaa laabe guibiguétabe lade ca binni ridagulisaa.

¹⁹ Casi ma' bidú'yanu lu tema ri', cadi gudí'nu lugar quite ladxido'no laanu. Neca gaca nagana

18, 19. Xi ndaaya' zanda guicaa ca xpinni Cristu ni ruzuuba' stiidxa' Jobá ora gúnica' stipa para cadi guidxaagaca' ti binnilídxica' ni ma' biree de ndaani' xquidxi Dios.

Cani jma naquiiñe' quietenaládxinu

- Xi naquiiñe' gúninu para chu'nu lu guendariziiládxí' sti' Dios.
- Xi naquiiñe' gúninu né ca conseju ni zeeda lu Biblia pa ma' biénenu xi canaba' Dios laanu.
- Pora nga raca nagana para laanu cadi guixéleno de Dios, ne xiñee risaca guzú'banu diidxa'.
- Xi chupa modo zanda guiénenu Hebreos 4:12.

para laanu gúninu ni na xiixa conseju zeeda lu Biblia, naquiiñe' gúninu ni, purti' nánnanu zacá nga jma jneza cusiidí' Jobá laanu gudxí'lunu ca guendanagana ca.

«Stiidxa Dios la? rudii enda nabani laanu»

²⁰ Ora guni' Pablu lu Hebreos 4:12 ca diidxa' ri': «Stiidxa Dios la? rudii enda nabani laanu», cadi caní'sibe de Biblia. Xcaadxi versículo ni zeeda lu capítulo ca rusihuinni caní'be de guirá' cani ma' guni' Dios chiguni.* Né ca diidxa' ri' guni' Pablu raca guirá' ni ruzabiruaa Jobá. Ne ngaca nga ni cusiene Jobá ora guni' ca diidxa' ri': «Zacá zaca stiidxa' [...]. Qué zabigueta' ni ra nuua sin gácani, sínuque [...] dxandí' zácani purti' para nga biseenda' ni» (Isa. 55:11). Nga runi, qué gápanu razón para guire'nu gana purti' si cadi cayaca xiixa nagueenda casi modo ñuuládxinu ñácani. «Dede yanna cayuni [Jobá] dxiiña'» ne zúnirube dxiiña' dede ora guiluxe gaca guirá' ni ma' gudixhe íquebe (Juan 5:17).

²¹ Nu stale xpinni Cristu ma' xadxi de cayúnica' ni na Jobá (Apo. 7:9). Stale de laacabe qué niní' íquecabe pa nabanirúcabe ora ñu'nu lu ca último dxi ri', peru neca ma' nagólacabe cayunirúcabe stipa para guni adorárcabe Jobá (Sal. 92:14). Xiñee ya'. Purti' nánnacabe rudii «Stiidxa Dios [...] enda nabani», ne cayuni Jobá dxiiña' para guni guirá' ni ma' guni'. Para Jobá nabé risaca ni maca gudixhe íquebe guni ne riéchebe ora gú'yabe laaca risácani para laanu. Ca dxi ri' nabáninu lu gadxe gubidxa ra caziiládxí' Dios, peru cadi cusaana de gúnibe dxiiña' para gaca ni ma' gudixhe íquebe, ne nánnabe zacané xquídxibe laabe para gácani. Casi ma' bizí'dinu ca, guiranu zanda chu'nu lu guendariziiládxí' sti' Dios. Ñee ma' nuulu' racá la?

* Ca dxi stinu ri', riquiiñe' Dios Biblia para guini'ne' laanu, ne nápani poder para gacaneni laanu gucha'nu modo nabáninu. Nga runi, laaca bia'si nga ni bisiene Pablu lu Hebreos 4:12 de Stiidxa' Dios.

20. Xi chupa modo zanda guíenecabe Hebreos 4:12. (Biiya' ni cá ñee yaza ri').

21. Ximodo caguu Hebreos 4:12 gana ca xpinni Cristu ni ma' nagola.